

## ➤ হারমানা হার পরাব তোমার গলে-

হার-মানা হার পরাব তোমার গলে-  
দূরে রব কত আপন বলের ছলে।  
জানি আমি জানি ভেসে যাবে আভিমান-  
নিবিড় ব্যথায় ফাটিয়া পড়িবে প্রাণ,  
শূন্য হিয়ার বাঁশিতে বাজিবে গান,  
পাষণ তখন গলিবে নয়নজলে।

শতদলদল খুলে যাবে থরে থরে,  
লুকানো রবে না মধু চিরদিন-তরে।  
আকাশ জুড়িয়া চাহিবে কাহার আঁখি,  
ঘরের বাহিরে নীরবে লইবে ডাকি,  
কিছুই সেদিন কিছুই রবে না বাকি-  
পরম মরণ লভিব চরনতলে।

রচনা: শান্তিনিকেতন ৭ বৈশাখ ১৩১৯  
রবীন্দ্র রচনাবলী, বিশ্বভারতী ১৩৮৯ সং খণ্ড ১১, পৃ ১৫৩ থেকে  
সংগৃহীত।

## ➤ যেদিন ফুটল কমল কিছুই জানি নাই

যেদিন ফুটল কমল কিছুই জানি নাই  
আমি ছিলাম অন্যমনে |  
আমার সাজিয়ে সাজি তারে আনি নাই  
সে যে রইল সঙ্গোপনে |  
মাঝে মাঝে হিয়া আকুলপ্রায়  
স্বপন দেখে চম্ কে উঠে চায়,  
মন্দ মধুর গন্ধ আসে হায়  
কোথায় দখিন সমীরণে |

ওগো সেই সুগন্ধে ফিরায় উদাসিয়া  
আমায় দেশে দেশান্তে |  
যেন সন্ধানে তার উঠে নিঃস্বাসিয়া  
ভুবন নবীন বসন্তে |  
কে জানিত দূরে ত নেই সে  
আমারি গো আমারি সেই যে,  
এ মাধুরী ফুটেছে হায়রে  
আমার হৃদয় উপবনে |

শিলাইদহ ২৬ চৈত্র ১৩১৮  
গীতিমাল্য - ১৭, গীতাঞ্জলি

## ➤ অনেক কালের যাত্রা আমার

অনেক কালের যাত্রা আমার  
অনেক দূরের পথে,  
প্রথম বাহির হয়েছিলেম  
প্রথম-আলোর রথে |  
গ্রহে তারায় বেঁকে বেঁকে  
পথের চিহ্ন এলেম ঐকে  
কত যে লোক-লোকান্তরের  
অরণ্যে পর্বতে |

সবার চেয়ে কাছে আসা  
সবার চেয়ে দূর |  
বড় কঠিন সাধনা, যার  
বড় সহজ সুর |  
পরের দ্বারে ফিরে, শেষে  
আসে পথিক আপন দেশে  
বাহির ভুবন ঘুরে মেলে  
অন্তরের ঠাকুর |

"এই যে তুমি" এই কথাটি  
বলব আমি বলে  
কত দিকেই চোখ ফেরালেম  
কত পথেই চলে |  
ভরিয়ে জগত লক্ষ ধারায়  
"আছ-আছ"র স্রোত বহে যায়  
"কই তুমি কই" এই কাঁদনের  
নয়ন-জলে গলে |

শিলাইদহ ২৪ চৈত্র ১৩১৮  
গীতিমাল্য ১৪

## ➤ আমার এই পথচাওয়াতেই আনন্দ-

আমার এই পথ-চাওয়াতেই আনন্দ।  
খেলে যায় রৌদ্র ছায়া, বর্ষা আসে বসন্ত।।  
কারা এই সমুখ দিয়ে আসে যায় খবর নিয়ে,  
খুশি রই আপন মনে- বাতাস বহে সুমন্দ।  
সারাদিন আঁখি মেলে দুয়ারে রব একা,  
শুভখন হঠাৎ এলে তখনি পাব দেখা।  
ততখন ক্ষণে ক্ষণে হাসি গাই আপন-মনে,  
ততখন রহি রহি ভেসে আসে সুগন্ধ।।

রচনা: শিলাইদহ ১৭ চৈত্র ১৩১৮

গীতবিতান পূজা ৫৫৯, বিশ্বভারতী ১৩৮০ সং পৃ ২২০ থেকে সংগৃহীত ।

পাঠান্তর:

গীতিমাল্যে (রবীন্দ্র রচনাবলী, বিশ্বভারতী ১৩৮৯ সং, খণ্ড ১১, পৃ ১৩৪)

পঙ্ক্তি ৭ এ "আপন-মনে" ছিল "মনে মনে"।

## ➤ শেষ থেয়া

দিনের শেষে ঘূমের দেশে ঘোমটা-পরা ওই ছায়া  
ভুলালো রে ভুলালো মোর প্রাণ।  
ও পারেতে সোনার কূলে আঁধারমূলে কোন্ মায়া  
গেয়ে গেল কাজ-ভাঙানো গান।  
নামিয়ে মুখ চুকিয়ে সুখ যাবার মুখে যায় যারা  
ফেরার পথে ফিরেও নাহি চায়,  
তাদের পানে ভাঁটার টানে যাব রে আজ ঘরছাড়া---  
সন্ধ্যা আসে দিন যে চলে যায়।  
ওরে আয়  
আমায় নিয়ে যাবি কে রে  
দিনশেষের শেষ থেয়ায়।

সাঁজের বেলা ভাঁটার স্রোতে ও পার হতে একটানা  
একটি-দুটি যায় যে তরী ভেসে।  
কেমন করে চিনব ওরে ওদের মাঝে কোন্‌খানা  
আমার ঘাটে ছিল আমার দেশে।  
অস্তাচলে তীরের তলে ঘন গাছের কোল ঘেঁষে  
ছায়ায় যেন ছায়ার মতো যায়,  
ডাকলে আমি ঝঞ্জে থামি হেথায় পাড়ি ধরবে সে  
এমন নেয়ে আছে রে কোন্‌ নায়।  
ওরে আয়  
আমায় নিয়ে যাবি কে রে  
দিনশেষের শেষ থেয়ায়।

ঘরেই যারা যাবার তারা কখন গেছে ঘরপানে,  
পারে যারা যাবার গেছে পারে;  
ঘরেও নহে, পারেও নহে, যে জন আছে মাঝখানে  
সন্ধ্যাবেলা কে ডেকে নেয় তারে।  
ফুলের বার নাইকো আর,  
ফসল যার ফলল না---  
চোখের জল ফেলতে হাসি পায়---  
দিনের আলো যার ফুরালো, সাঁজের আলো জ্বলল না,  
সেই বসেছে ঘাটের কিনারায়।  
ওরে আয়  
আমায় নিয়ে যাবি কে রে  
বেলাশেষের শেষ থেয়ায়।

- আশা, ১৩১২, থেয়া

## ➤ শাজাহান-

এ কথা জানিতে তুমি ভারত-ঈশ্বর শা-জাহান,  
কালস্রোতে ভেসে যায় জীবন যৌবন ধনমান।  
শুধু তব অন্তরবেদনা  
চিরন্তন হয়ে থাক, সম্রাটের ছিল এ সাধনা  
রাজশক্তি বজ্রসুকঠিন  
সম্ভারজ্ঞরাগসম তন্দ্রাতলে হয় হোক লীন  
কেবল একটি দীর্ঘশ্বাস  
নিত্য-উচ্ছ্বসিত হয়ে স্করণ করুক আকাশ,  
এই তব মনে ছিল আশ।  
হীরামুক্তামানিক্যের ঘটা  
যেন শূন্য দিগন্তের ইন্দ্রজাল ইন্দ্রধনুষ্টি  
যায় যদি লুপ্ত হয়ে যাক,  
শুধু থাক  
একবিন্দু নয়নের জল  
কালের কপোলতলে শুভ্র সমুজ্জল  
এ তাজমহল॥

হায় ওরে মানবহৃদয়,  
বার বার  
কারো পানে ফিরে চাহিবার  
নাই যে সময়,  
নাই নাই।  
জীবনের খরস্রোতে ভাসিছ সদাই  
ভুবনের ঘাটে ঘাটে---  
এক হাতে লও বোঝা, শূন্য করে দাও অন্য হাতে।  
দক্ষিণের মল্লগুঞ্জরণে  
তব কুঞ্জবনে  
বসন্তের মাধবীমঞ্জরি  
যেই ক্ষণে দেয় ভরি  
মালঞ্চের চঞ্চল অঞ্চল---  
বিদায়গোধূলি আসে ধুলায় ছড়ায়ে ছিল দল।  
সময় যে নাই,  
আবার শিশিররাতে তাই

নিকুঞ্জে ফুটায়ে তোল নব কুন্দরাজি  
সাজাইতে হেমন্তের অশ্রুভরা আনন্দের সাজি।  
হায় রে হৃদয়,  
তোমার সঞ্চয়  
দিনান্তে নিশান্তে শুধু পথপ্রান্তে ফেলে যেতে হয়।  
নাই নাই, নাই যে সময়॥

হে সম্রাট, তাই তব শঙ্কিত হৃদয়  
চেয়েছিল করিবারে সময়ের হৃদয়হরণ  
সৌন্দর্যে ভুলায়ে।  
কণ্ঠে তার কী মালা দুলায়ে  
করিলে বরণ  
রূপহীন মরণেরে মৃত্যুহীন অপরূপ সাজে!  
রহে না যে  
বিলাপের অবকাশ  
বারো মাস,  
তাই তব অশান্ত ক্রন্দনে  
চিরমৌনজাল দিয়ে বেঁধে দিলে কঠিন বন্ধনে।  
জ্যোৎস্নারাতে নিভৃত মন্দিরে  
প্রেমসীরে  
যে নামে ডাকিতে ধীরে ধীরে  
সেই কানে-কানে ডাকা রেখে গেলে এইখানে  
অনন্তের কানে।  
প্রেমের করুণ কোমলতা,  
ফুটিল তা  
সৌন্দর্যের পুষ্পপুঞ্জে প্রশান্ত পাশাগে॥

হে সম্রাট কবি,  
এই তব হৃদয়ের ছবি,  
এই তব নব মেঘদূত,  
অপূর্ব অদ্ভুত  
ছন্দে গানে  
উঠিয়াছে অলক্ষ্যের পানে---  
যেথা তব বিরহিণী প্রিয়া  
রয়েছে মিশিয়া  
প্রভাতের অরুণ-আভাসে,  
ক্লান্তসন্ধ্যা দিগন্তের করুণ নিশ্বাসে,  
পূর্ণিমায় দেহহীন চামেলীর লাবণ্যবিলাসে,

ভাষার অতীত তীরে  
কাঙাল নয়ন যেথা দ্বার হতে আসে ফিরে ফিরে।  
তোমার সৌন্দর্যদূত যুগ যুগ ধরি  
এড়াইয়া কালের প্রহরী  
চলিয়াছে বাক্যহারা এই বার্তা নিয়া---  
'ভুলি নাই, ভুলি নাই, ভুলি নাই প্রিয়া!'

চলে গেছ তুমি আজ,  
মহারাজ---  
রাজ্য তব স্বপ্নসম গেছে ছুটে,  
সিংহাসন গেছে টুটে,  
তব সৈন্যদল  
মাদের চরণভরে ধরণী করিত টলমল  
তাহাদের স্মৃতি আজ বায়ুভরে  
উড়ে যায় দিল্লির পথের ধূলি-'পরে।  
বন্দীরা গাহে না গান,  
যমুনাকল্লোল-সাথে নহবত মিলায় না তান।  
তব পুরসুন্দরীর নূপুরনিষ্কণ  
ভগ্ন প্রাসাদের কোণে  
ম'রে গিয়ে ঝিল্লিস্বনে  
কাঁদায় রে নিশার গগন।  
তবুও তোমার দূত অমলিন,  
শ্রান্তিক্লান্তিহীন,  
তুচ্ছ করি রাজ্য-ভাঙাগড়া,  
তুচ্ছ করি জীবনমৃত্যুর ওঠাপড়া,  
যুগে যুগান্তরে  
কহিতেছে একস্বরে  
চিরবিরহীর বাণী নিয়া---  
'ভুলি নাই, ভুলি নাই, ভুলি নাই প্রিয়া!'

মিথ্যা কথা! কে বলে যে ভোল নাই?  
কে বলে রে খোল নাই  
স্মৃতির পিঞ্জরদ্বার?  
অতীতের চির-অস্ত-অন্ধকার  
আজিও হৃদয় তব রেখেছে বাঁধিয়া?  
বিস্মৃতির মুক্তিপথ দিয়া  
আজিও সে হয়নি বাহির?



সমাধিমন্দির এক ঠাঁই রহে চিরস্থির,  
ধরার ধূলায় থাকি  
স্মরণের আবরণে মরণেরে যত্নে রাখে ঢাকি।  
জীবনের কে রাখিতে পারে!  
আকাশের প্রতি তারা ডাকিছে তাহারে।  
তার নিমন্ত্রণ লোকে লোকে  
নব নব পূর্বাচলে আলোকে আলোকে।  
স্মরণের গ্রন্থি টুটে  
সে যে যায় ছুটে  
বিশ্বপথে বন্ধনবিহীন।  
মহারাজ, কোনো মহারাজ্য কোনোদিন  
পারে নাই তোমারে ধরিতে।  
সমুদ্রস্তুনিত পৃথ্বী, হে বিরাট, তোমারে ভরিতে  
নাহি পারে---  
তাই এ ধরারে  
জীবন-উৎসব-শেষে দুই পায়ে ঠেলে  
মৃৎপাত্রের মত যাও ফেলে।  
তোমার কীর্তির চেয়ে তুমি যে মহত,  
তাই তব জীবনের রথ  
পশ্চাতে ফেলিয়া যায় কীর্তিরে তোমার  
বারম্বার।  
তাই  
চিহ্ন তব পড়ে আছে, তুমি হেথা নাই।  
যে প্রেম সন্মুখপানে  
চলিতে চালাতে নাহি জানে,  
যে প্রেম পথের মধ্যে পেতেছিল নিজসিংহাসন,  
তার বিলাসের সম্ভাষণ  
পথের ধূলার মতো জড়িয়ে ধরেছে তব পায়ে---  
দিয়েছ তা ধূলিরে ফিরায়ে।  
সেই তব পশ্চাতের পদধূলি-'পরে  
তব চিত্ত হতে বায়ুভরে  
কখন সহসা  
উড়ে পড়েছিল বীজ জীবনের মাল্য হতে থসা।  
তুমি চলে গেছ দূরে,  
সেই বীজ অমর অঙ্কুরে  
উঠেছে অশ্রু-পানে,  
কহিছে গম্ভীর গানে---  
'যত দূর চাই

নাই নাই সে পথিক নাই।  
প্রিয়া তারে রাখিল না, রাজ্য তারে ছাড়ি দিল পথ,  
রুধিল না সমুদ্র পর্বত।  
আজি তার রথ  
চলিয়াছে রাত্রির আন্ধানে  
নক্ষত্রের গানে  
প্রভাতের সিংহদ্বার-পানে।  
তাই  
স্মৃতিভারে আমি পড়ে আছি,  
ভারমুক্ত সে এখানে নাই।'

## ➤ অনন্ত প্রেম

তোমারেই যেন ভালোবাসিয়াছি শত রূপে শতবার  
জনমে জনমে যুগে যুগে অনিবার।  
চিরকাল ধরে মুগ্ধ হৃদয় গাঁথিয়াছে গীতহার—  
কত রূপ ধরে পরেছ গলায়, নিয়েছ সে উপহার  
জনমে জনমে যুগে যুগে অনিবার।

যত শুনি সেই অতীত কাহিনী, প্রাচীন প্রেমের ব্যথা,  
অতি পুরাতন বিরহমিলন কথা,  
অসীম অতীতে চাহিতে চাহিতে দেখা দেয় অবশেষে  
কালের তিমিররজনী ভেদিয়া তোমারি মুরতি এসে  
চিরস্মৃতিময়ী ধ্রুবতারকার বেশে।

আমরা দুজনে ভাসিয়া এসেছি যুগলপ্রেমের স্রোতে  
অনাদি কালের হৃদয়উৎস হতে।—  
আমরা দুজনে করিয়াছি খেলা কোটি প্রেমিকের মাঝে  
বিরহবিধুর নয়নসলিলে, মিলনমধুর লাজে—  
পুরাতন প্রেম নিত্যনূতন সাজে।

আজি সেই চিরদিবসের প্রেম অবসান লভিয়াছে—,  
রাশি রাশি হয়ে তোমার পায়ের কাছে।  
নিখিলের সুখ, নিখিলের দুখ, নিখিল প্রাণের প্রীতি,  
একটি প্রেমের মাঝারে মিশেছে সকল প্রেমের স্মৃতি—  
সকল কালের সকল কবির গীতি।

## ➤ আজ ধানের ক্ষেতে রৌদ্রছায়ায়

আজ ধানের ক্ষেতে রৌদ্রছায়ায়  
লুকোচুরির খেলা।  
নীল আকাশে কে ভাসালে  
সাদা মেঘের ভেলা।  
আজ ভ্রমর ভোলে মধু খেতে,  
উড়ে বেড়ায় আলোয় মেতে,  
আজ কিসের তরে নদীর চরে  
চখাচখির মেলা।

ওরে যাবো না আজ ঘরে রে ভাই,  
যাবো না আজ ঘরে!  
ওরে আকাশ ভেঙে বাহিরকে আজ  
নেব রে লুঠ করে।  
যেন জোয়ার জলে ফেনার রাশি  
বাতাসে আজ ফুটেছে হাসি,  
আজ বিনা কাজে বাজিয়ে বাঁশি  
কাটবে সারা বেলা।

১৩১৩

কাব্যগ্রন্থঃ গীতাঞ্জলি

রচনা সংখ্যাঃ ৮

## ➤ অমন আড়াল দিয়ে লুকিয়ে গেলে

অমন আড়াল দিয়ে লুকিয়ে গেলে  
চলবে না।  
এবার হৃদয় মাঝে লুকিয়ে বোসো,  
কেউ জানবে না, কেউ বলবে না।  
বিশ্বে তোমার লুকোচুরি,  
দেশ বিদেশে কতই ঘুরি -  
এবার বলো আমার মনের কোণে  
দেবে ধরা, ছলবে না।  
আড়াল দিয়ে লুকিয়ে গেলে  
চলবে না।

জানি আমার কঠিন হৃদয়  
চরণ রাখার যোগ্য সে নয় -  
সখা, তোমার হাওয়া লাগলে হিয়ায়  
তবু কি প্রাণ গলবে না।

না হয় আমার নাই সাধনা,  
ঝরলে তোমার কৃপার কণা  
তখন নিমেষে কি ফুটেবে না ফুল  
চকিতে ফল ফলবে না।  
আড়াল দিয়ে লুকিয়ে গেলে  
চলবে না।

বোলপুর, ১১ ভাদ্র ১৩১৬  
কাব্যগ্রন্থঃ গীতাঞ্জলি  
রচনা সংখ্যাঃ ২৩

## ➤ পুরস্কার

সেদিন বরষা ঝরঝর করে  
কহিল কবির স্ত্রী  
‘রাশি রাশি মিল করিয়াছ জড়ো,  
রচিতেছ বসি পুঁথি বড়ো বড়ো,  
মাথার উপরে বাড়ি পড়ো-পড়ো,  
তার খোঁজ রাখ কি!  
গাঁথিছ ছন্দ দীর্ঘ হ্রস্ব---  
মাথা ও মুণ্ড, ছাই ও ভস্ম,  
মিলিবে কি তাহে হস্তী অশ্ব,  
না মিলে শস্যকণা।  
অল্প জোটে না, কথা জোটে মেলা,  
নিশিদিন ধ’রে এ কি ছেলেখেলা!  
ভারতীয়ে ছাড়ি ধরো এইবেলা  
লক্ষ্মীর উপাসনা।  
ওগো, ফেলে দাও পুঁথি ও লেখনী,  
যা করিতে হয় করহ এখনি।  
এত শিখিয়াছ এটুকু শেখ নি  
কিসে কড়ি আসে দুটো!’  
দেখি সে মুরতি সর্বনাশিয়া  
কবির পরান উঠিল ত্রাসিয়া,  
পরিহাসছলে ঈষৎ হাসিয়া  
কহে জুড়ি করপুট,  
‘ভয় নাহি করি ও মুখ-নাড়ারে,  
লক্ষ্মী সদয় লক্ষ্মীছাড়ারে,  
ঘরেতে আছেন নাইকো ভাঁড়ারে  
এ কথা শুনিবে কেবা!  
আমার কপালে বিপরীত ফল---  
চপলা লক্ষ্মী মোর অচপল,  
ভারতী না থাকে থির এক পল  
এতো করি তাঁর সেবা।

তাই তো কপাটে লাগাইয়া থিল  
স্বর্গে মর্তে খুঁজিতেছি মিল,  
আনমনা যদি হই এক-তিল  
অমনি সর্বনাশ!'  
মনে মনে হাসি মুখ করি ভার  
কহে কবিজায়া, 'পারি নেকো আর,  
ঘরসংসার গেল ছারেখার,  
সব তাতে পরিহাস!'  
এতেক বলিয়া বাঁকায়ে মুখানি  
শিঞ্জিত করি কাঁকন-দুখানি  
চঞ্চল করে অঞ্চল টানি  
রোষছলে যায় চলি।  
হেরি সে ভুবন-গরব-দমন  
অভিমানবেগে অধীর গমন  
উচাটন কবি কহিল, 'অমন  
যেয়ো না হৃদয় দলি।  
ধরা নাহি দিলে ধরিব দু পায়,  
কী করিতে হবে বেলো সে উপায়,  
ঘর ভরি দিব সোনায়ে রূপায়---  
বুদ্ধি জোগাও ভুমি।  
একটুকু ফাঁকা যেখানে যা পাই  
তোমার মুরতি সেখানে চাপাই,  
বুদ্ধির চাষ কোনোখানে নাই---  
সমস্ত মরুভূমি।'  
'হয়েছে, হয়েছে, এত ভালো নয়'  
হাসিয়া রুম্বিয়া গৃহিণী ভনয়,  
'যেমন বিনয় তেমনি প্রণয়  
আমার কপালগুণে।  
কথার কখনো ঘটে নি অভাব,  
যখনি বলেছি পেয়েছি জবাব,  
একবার ওগো বাক্য-নবাব  
চলো দেখি কথা শুনে।  
শুভ দিন ফ্রন দেখো পাঁজি খুলি,  
সঙ্গে করিয়া লহো পুঁথিগুলি,

ক্ষণিকের তরে আলস্য ভুলি  
চলো রাজসভা-মাঝে।  
আমাদের রাজা গুণীর পালক,  
মানুষ হইয়া গেল কত লোক,  
ঘরে তুমি জমা করিলে শোলোক  
লাগিবে কিসের কাজে!'  
কবির মাথায় ভাঙি পড়ে বাজ,  
ভাবিল--- বিপদ দেখিতেছি আজ,  
কখনো জানি নে রাজা মহারাজ,  
কপালে কী জানি আছে!  
মুখে হেসে বলে, 'এই বৈ নয়!  
আমি বলি, আরো কী করিতে হয়!  
প্রাণ দিতে পারি, শুধু জাগে ভয়  
বিধবা হইবে পাছে।  
যেতে যদি হয় দেহিতে কী কাজ,  
স্বরা করে তবে নিয়ে এসো সাজ---  
হেমকুণ্ডল, মণিময় তাজ,  
কেয়ূর, কনকহার।  
বলে দাও মোর সারথিরে ডেকে  
ঘোড়া বেছে নেয় ভালো ভালো দেখে,  
কিষ্করগণ সাথে যাবে কে কে  
আয়োজন করো তার।'  
ব্রাহ্মণী কহে, 'মুখাগ্রে যার  
বাধে না কিছুই, কী চাহে সে আর  
মুখ ছুটাইলে রথাস্থে তার  
না দেখি আবশ্যক।  
নানা বেশভূষা হীরা রূপা সোনা  
এনেছি পাড়ার করি উপাসনা,  
সাজ করে লও পুরায়ে বাসনা,  
রসনা ক্ষান্ত হোক।'  
এতেক বলিয়া স্বরিতচরণ  
আনে বেশবাস নানান-ধরন,  
কবি ভাবে মুখ করি বিবরন---  
আজিকে গতিক মন্দ।



গৃহিণী স্বয়ং নিকটে বসিয়া  
তুলিল তাহারে মাজিয়া ঘষিয়া,  
আপনার হাতে যতনে কষিয়া  
পরাইল কটিবন্ধ।  
উষ্ণীষ আনি মাথায় চড়ায়,  
কন্ঠী আনিয়া কন্ঠে জড়ায়,  
অঙ্গদ দুটি বাহুতে পরায়,  
কুণ্ডল দেয় কানে।  
অঙ্গে যতই চাপায় রতন  
কবি বসি থাকে ছবির মতন,  
প্রেয়সীর নিজ হাতের যতন  
সেও আজি হার মানে।  
এইমতে দুই প্রহর ধরিয়া  
বেশভূষা সব সমাধা করিয়া  
গৃহিণী নিরখে ঈষত সরিয়া  
বাঁকায়ে মধুর গ্রীবা।  
হেরিয়া কবির গম্ভীর মুখ  
হৃদয়ে উপজে মহা কৌতুক;  
হাসি উঠি কহে ধরিয়া চিবুক,  
'আ মরি, সেজেছ কিবা!'  
ধরিল সমুখে আরশি আনিয়া;  
কহিল বচন অমিয় ছানিয়া,  
'পুরনারীদের পরান হানিয়া  
ফিরিয়া আসিবে আজি।  
তখন দাসীরে ভুলো না গরবে,  
এই উপকার মনে রেখো তবে,  
মোরেও এমন পরাইতে হবে  
রতনভূষণরাজি।'  
কোলের উপরে বসি বাহুপাশে  
বাঁধিয়া কবিরে সোহাগে সহাসে  
কপোল রাখিয়া কপোলের পাশে  
কানে কানে কথা কয়।  
দেখিতে দেখিতে কবির অধরে  
হাসিরাশি আর কিছুতে না ধরে,

মুগ্ধ হৃদয় গলিয়া আদরে  
ফাটিয়া বাহির হয়।  
কহে উচ্ছ্বসি, 'কিছু না মানিব,  
এমনি মধুর শ্লোক বাথানিব  
রাজভাণ্ডার টানিয়া আনিব  
ও রাঙা চরণতলে!'  
বলিতে বলিতে বুক উঠে ফুলি,  
উষ্ণীষ-পর্য্য মস্তক তুলি  
পথে বাহিরায় গৃহদ্বার খুলি,  
দ্রুত রাজগৃহে চলে।  
কবির রমণী কুতূহলে ভাসে,  
তাড়তাড়ি উঠি বাতায়নপাশে  
উঁকি মারি চায়, মনে মনে হাসে---  
কালো চোখে আলো নাচে।  
কহে মনে মনে বিপুলপুলকে---  
রাজপথ দিয়ে চলে এত লোকে,  
এমনটি আর পড়িল না চোখে  
আমার যেমন আছে॥  
এ দিকে কবির উৎসাহ ক্রমে  
নিমেষে নিমেষে আসিতেছে কমে,  
যখন পশিল নৃপ-আশ্রমে  
মরিতে পাইলে বাঁচে।  
রাজসভাসদ সৈন্য পাহারা  
গৃহিণীর মতো নহে তো তাহারা,  
সারি সারি দাড়ি করে দিশাহারা---  
হেথা কী আসিতে আছে!  
হেসে ভালোবেসে দুটো কথা কয়  
রাজসভাগৃহ হেন ঠাঁই নয়,  
মন্ত্রী হইতে দ্বারীমহাশয়  
সবে গম্ভীরমুখ।  
মানুষে কেন যে মানুষের প্রতি  
ধরি আছে হেন যমের মুরতি  
তাই ভাবি কবি না পায় ফুরতি---  
দমি যায় তার বুক।

বসি মহারাজ মহেন্দ্ৰায়  
মহোচ্চ গিরিশিখরের প্রায়,  
জন-অরণ্য হেরিছে হেলায়  
অচল-অটল ছবি।  
কৃপানির্বর পড়িছে ঝরিয়া  
শত শত দেশ সরস করিয়া,  
সে মহামহিমা নয়ন ভরিয়া  
চাহিয়া দেখিল কবি।  
বিচার সমাধা হল যবে, শেষে  
ইঙ্গিত পেয়ে মন্ত্রী-আদেশে  
জোড়করপুটে দাঁড়াইল এসে  
দেশের প্রধান চর।  
অতি সাধুমত আকার প্রকার,  
এক-তিল নাহি মুখের বিকার,  
ব্যবসা যে তাঁর মানুষ-শিকার  
নাহি জানে কোনো নর।  
ব্রত নানামত সতত পালয়ে,  
এক কানাকড়ি মূল্য না লয়ে  
ধর্মোপদেশ আনয়ে আনয়ে  
বিতরিছে যাকে তাকে।  
চোরা কটাক্ষ চক্ষে ঠিকরে---  
কী ঘটিছে কার, কে কোথা কী করে  
পাতায় পাতায় শিকড়ে শিকড়ে  
সন্ধান তার রাখে।  
নামাবলি গায়ে বৈষ্ণবরূপে  
যখন সে আসি প্রণমিল ভূপে,  
মন্ত্রী রাজারে অতি চুপে চুপে  
কী করিল নিবেদন।  
অমনি আদেশ হইল রাজার,  
'দেহো ঐরে টাকা পঞ্চ হাজার।'  
'সাধু সাধু' কহে সভার মাঝার  
যত সভাসদজন।  
পুলক প্রকাশে সবার গাত্রে---  
'এ যে দান ইহা যোগ্যপাত্রে,

দেশের আবাল-বনিতা-মাত্রে  
ইথে না মানিবে দ্বেষ।'  
সাধু নুয়ে পড়ে নম্রতাভরে,  
দেখি সভাজন 'আহা আহা' করে,  
মন্ত্রীর শুধু জাগিল অধরে  
ঈষৎ হাস্যলেশ।  
আসে গুটি গুটি বৈয়াকরণ  
ধূলিভরা দুটি লইয়া চরণ  
চিহ্নিত করি রাজাস্তরণ  
পবিত্র পদপঙ্কে।  
ললাটে বিন্দু বিন্দু ঘর্ম,  
বলি-অঙ্কিত শিথিল চর্ম,  
প্রথরমূর্তি অগ্নিশর্ম---  
ছাত্র মরে আতঙ্কে।  
কোনো দিকে কোনো লক্ষ না ক'রে  
পড়ি গেল শ্লোক বিকট হাঁ ক'রে,  
মটর কড়াই মিশায়ে কাঁকরে  
চিবাইল যেন দাঁতে।  
কেহ তার নাহি বুঝে আগুপিছু,  
সবে বসি থাকে মাথা করি নিচু;  
রাজা বলে, 'এঁরে দক্ষিণা কিছু  
দাও দক্ষিণ হাতে।'  
তার পরে এল গনংকার,  
গণনায় রাজা চমংকার,  
টাকা ঝন্ ঝন্ ঝনংকার  
বাজায়ে সে গেল চলি।  
আসে এক বুড়ো গণ্যমান্য  
করপুটে লয়ে দুর্বাধান্য,  
রাজা তাঁর প্রতি অতি বদান্য  
ভরিয়া দিলেন থলি।  
আসে নট ভাট রাজপুরোহিত---  
কেহ একা কেহ শিষ্য-সহিত,  
কারো বা মাথায় পাগড়ি লোহিত  
কারো বা হরিংবর্ণ।

আসে দ্বিজগণ পরমারাধ্য---  
কন্যার দায়, পিতার শ্রাদ্ধ---  
যার যথামত পায় বরাদ্দ;  
রাজা আজি দাতাকর্ণ।  
যে যাহার সবে যায় স্বভবনে,  
কবি কী করিবে ভাবে মনে মনে,  
রাজা দেখে তারে সভাগৃহকোণে  
বিপন্নমুখছবি।  
কহে ভূপ, 'হোথা বসিয়া কে ওই,  
এস তো, মন্ত্রী, সন্ধান লই।'  
কবি কহি উঠে, 'আমি কেহ নই,  
আমি শুধু এক কবি।'  
রাজা কহে, 'বটে! এসো এসো তবে,  
আজিকে কাব্য-আলোচনা হবে।'  
বসাইলা কাছে মহাগৌরবে  
ধরি তার কর দুটি।  
মন্ত্রী ভাবিল, যাই এই বেলা,  
এখন তো শুরু হবে ছেলেখেলা---  
কহে, 'মহারাজ, কাজ আছে মেলা,  
আদেশ পাইলে উঠি।'  
রাজা শুধু মৃদু নাড়িলা হস্ত,  
নৃপ-ইঙ্গিতে মহা তটস্থ  
বাহির হইয়া গেল সমস্ত  
সভাস্থ দলবল---  
পাত্র মিত্র অমাত্য আদি,  
অর্থী প্রার্থী বাদী প্রতিবাদী,  
উচ্চ তুচ্ছ বিবিধ-উপাধি  
বন্যার যেন জল॥  
চলি গেল যবে সভ্যসুজন  
মুখোমুখি করি বসিলা দুজন;  
রাজা বলে, 'এবে কাব্যকূজন  
আরম্ভ করো কবি।'  
কবি তবে দুই কর জুড়ি বুকে  
বাণীবন্দনা করে নত মুখে,

‘প্রকাশো জননী নয়নসমুখে  
প্রসন্ন মুখছবি।  
বিমল মানসসরস-বাসিনী  
শুক্রবসনা শুভ্রহাসিনী  
বীণাগঞ্জিতমঞ্জুভাষিনী  
কমলকুণ্ডাসনা,  
তোমারে হৃদয়ে করিয়া আসীন  
সুখে গৃহকোণে ধনমানহীন  
খ্যাপার মতন আছি চিরদিন  
উদাসীন আনমনা।  
চারি দিকে সবে বাঁটিয়া দুনিয়া  
আপন অংশ নিতেছে গুনিয়া,  
আমি তব স্নেহবচন শুনিয়া  
পেয়েছি স্বরগসুধা।  
সেই মোর ভালো, সেই বহু মানি,  
তবু মাঝে মাঝে কেঁদে ওঠে প্রাণী---  
সুরের খাদ্যে জানো তো মা, বানী,  
নরের মিটে না ক্ষুধা।  
যা হবার হবে সে কথা ভাবি না,  
মা গো, একবার ঝংকারো বীণা,  
ধরহ রাগিনী বিশ্বপ্লাবিনী  
অমৃত-উৎস-ধারা।  
যে রাগিনী শুনি নিশিদিনমান  
বিপুল হর্ষে দ্রব ভগবান  
মলিনমর্ত-মাঝে বহমান  
নিয়ত আত্মহারা।  
যে রাগিনী সদা গগন ছাপিয়া  
হোমশিখাসম উঠিছে কাঁপিয়া,  
অনাদি অসীমে পড়িছে ঝাঁপিয়া  
বিশ্বতন্ত্রী হতে।  
যে রাগিনী চিরজন্ম ধরিয়া  
চিওকুহরে উঠে কুহরিয়া---  
অশ্রুহাসিতে জীবন ভরিয়া  
ছুটে সহস্র স্রোতে।

কে আছে কোথায়, কে আসে কে যায়,  
নিমেষে প্রকাশে, নিমেষে মিলায়---  
বালুকার'পরে কালের বেলায়

ছায়া-আলোকের খেলা।

জগতের যত রাজা মহারাজ  
কাল ছিল যারা কোথা তারা আজ,  
সকালে ফুটিছে সুখদুখলাজ---

টুটিছে সন্ধ্যাবেলা।

শুধু তার মাঝে ধ্বনিতেছে সুর  
বিপুল বৃহত্ত গভীর মধুর,  
চিরদিন তাহে আছে ভরপুর

মগন গগনতল।

যে জন শুনেছে সে অনাদি ধ্বনি  
ভাসায়ে দিয়েছে হৃদয়তরঙ্গী---  
জানে না আপনা, জানে না ধরনী,  
সংসারকোলাহল।

সে জন পাগল, পরান বিকল---  
ভবকূল হতে ছিঁড়িয়া শিকল  
কেমনে এসেছে ছাড়িয়া সকল,  
ঠেকেছে চরণে তব।

তোমার অমল কমলগন্ধ  
হৃদয়ে ঢালিছে মহা-আনন্দ---  
অপূর্ব গীত, আলোক ছন্দ  
শুনিছ নিত্য নব।

বাজুক সে বীণা, মজুক ধরনী---  
বারেকের তরে ভুলাও, জননী,  
কে বড়ো কে ছোটো, কে দীন কে ধনী,  
কেবা আগে কেবা পিছে---

কার জয় হল কার পরাজয়,  
কাহার বৃদ্ধি কার হল ক্ষয়,  
কেবা ভালো আর কেবা ভালো নয়,  
কে উপরে কেবা নীচে।

গাঁথা হয়ে যাক এক গীতরবে  
ছোটো জগতের ছোটোবড়ো সবে,

সুখে প'ড়ে রবে পদপল্লবে  
যেন মালা একখানি।  
তুমি মানসের মাঝখানে আসি  
দাঁড়াও মধুর মুরতি বিকাশি,  
কুন্দবরণ-সুন্দর-হাসি  
বীণা হাতে বীণাপাণি।  
ভাসিয়া চলিবে রবি শশী তারা  
সারি সারি যত মানবের ধারা  
অনাদিকালের পান্থ যাহারা  
তব সংগীতশ্রোতে।  
দেখিতে পাইব ব্যোমে মহাকাল  
ছন্দে ছন্দে বাজাইছে তাল,  
দশ দিক্‌বধু খুলি কেশজাল  
নাচে দশ দিক হতে।'।  
এতেক বলিয়া ক্ষণপরে কবি  
করণ কথায় প্রকাশিল ছবি  
পূণ্যকোহিনী রঘুকুলরবি  
রাঘবের ইতিহাস।  
অসহ দুঃখ সহি নিরবধি  
কেমনে জনম গিয়েছে দগধি,  
জীবনের শেষ দিবস অবধি  
অসীম নিরাশ্বাস।  
কহিল, 'বারেক ভাবি দেখো মনে  
সেই একদিন কেটেছে কেমনে  
যেদিন মলিন বাকলবসনে  
চলিলা বনের পথে---  
ভাই লক্ষ্মণ বয়স নবীন,  
শ্লানছায়াসম বিষাদবিলীন  
নববধু সীতা আভরণহীন  
উঠিলা বিদায়রথে।  
রাজপুরী-মাঝে উঠে হাহাকার,  
প্রজা কাঁদিতেছে পথে সারে-সার,  
এমন বজ্র কখনো কি আর  
পড়েছে এমন ঘরে!



অভিষেক হবে, উৎসবে তার  
আনন্দময় ছিল চারি ধার---  
মঙ্গলদীপ নিবিয়া আঁধার  
শুধু নিমেষের ঝড়ে।  
আর-একদিন, ভেবে দেখো মনে,  
যেদিন শ্রীরাম লয়ে লক্ষ্মণে  
ফিরিয়া নিভৃত কুটিরভবনে  
দেখিলা জানকী নাহি---  
'জানকী' 'জানকী' আর্ত রোদনে  
ডাকিয়া ফিরিলা কাননে কাননে,  
মহা-অরণ্য আঁধার-আননে  
রহিল নীরবে চাহি।  
তার পরে দেখো শেষ কোথা এর,  
ভেবে দেখো কথা সেই দিবসের---  
এত বিষাদের এত বিরহের  
এত সাধনার ধন,  
সেই সীতাদেবী রাজসভা-মাঝে  
বিদায়বিনয়ে নমি রঘুরাজে  
দ্বিধা ধরাতলে অভিমানে লাজে  
হইলা অদর্শন।  
সে-সকল দিন সেও চলে যায়,  
সে অসহ শোক--- চিহ্ন কোথায়---  
যায় নি তো ঐকে ধরণীর গায়  
অসীম দন্ধরেখা।  
দ্বিধা ধরাভূমি জুড়েছে আবার,  
দণ্ডকবনে ফুটে ফুলভার,  
সরযূর কূলে দুলে তৃণসার  
প্রফুল্লশ্যামলেখা।  
শুধু সে দিনের একখানি সুর  
চিরদিন ধরে বহু বহু দূর  
কাঁদিয়া হৃদয় করিছে বিধুর  
মধুর করুণ তানে।  
সে মহাপ্রাণের মাঝখানটিতে  
যে মহারাগিণী আছিল ধ্বনিতে

আজিও সে গীত মহাসংগীতে  
বাজে মানবের কানে।'  
তার পরে কবি কহিল সে কথা,  
কুরুপাণ্ডবসমরবারতা---  
গৃহবিবাদের ঘোর মত্ততা  
ব্যাপিল সর্ব দেশ;  
দুইটি যমজ তরু পাশাপাশি,  
ঘর্ষণে স্বলে হতাশনরাশি,  
মহাদাবানল ফেলে শেষে গ্রাসি  
অরণ্যপরিবেশ।  
এক গিরি হতে দুই-স্রোত-পারা  
দুইটি শীর্ণ বিদ্রোহধারা  
সরীসৃপগতি মিলিল তাহারা  
নিষ্ঠুর অভিমানে,  
দেখিতে দেখিতে হল উপনীত  
ভারতের যত ক্ষত্রশোণিত---  
ত্রাসিত ধরণী করিল ধ্বনিত  
প্রলয়বন্যাগানে।  
দেখিতে দেখিতে ডুবে গেল কূল,  
আত্ম ও পর হয়ে গেল ভুল,  
গৃহবন্ধন করি নির্মূল  
ছুটিল রক্তধারা---  
ফেনায়ে উঠিল মরণাশ্রুধি,  
বিশ্ব রহিল নিশ্বাস রুদ্ধি  
কাঁপিল গগন শত আঁখি মুদি  
নিবাসে সূর্যতারা।  
সমরবন্যা যবে অবসান  
সোনার ভারত বিপুল স্মশান,  
রাজগৃহ যত ভূতলশয়ান  
পড়ে আছে ঠাঁই ঠাঁই।  
ভীষণা শান্তি রক্তনয়নে  
বসিয়া শোণিতপঙ্কশয়নে,  
চাহি ধরা-পানে আনতবয়নে  
মুখেতে বচন নাই।

বহু দিন পরে ঘুচিয়াছে খেদ,  
মরণে মিটেছে সব বিচ্ছেদ,  
সমাধা যন্ত মহা-নরমেধ  
বিদ্রোহতাশনে।  
সকল কামনা করিয়া পূর্ণ  
সকল দম্ব করিয়া চূর্ণ  
পাঁচ ভাই গিয়া বসিলা শূন্য  
স্বর্ণসিংহাসনে।  
সুন্ধ প্রাসাদ বিষাদ-আঁধার,  
শ্মশান হইতে আসে হাহাকার  
রাজপুরবধু যত অনাথার  
মর্মবিদার রব।  
'জয় জয় জয় পাণ্ডুতনয়'  
সারি সারি দ্বারী দাঁড়াইয়া কয়---  
পরিহাস বলে আজ মনে হয়,  
মিছে মনে হয় সব।  
কালি যে ভারত সারা দিন ধরি  
অটু গরজে অম্বর ভরি  
রাজার রক্তে খেলেছিল হোরি  
ছাড়ি কুলভয়লাজে,  
পরদিনে চিতাভস্ম মাখিয়া  
সন্ধ্যাসীবেশে অঙ্গ ঢাকিয়া  
বসি একাকিনী শোকাক্তহিয়া  
শূন্যশ্মশানমাঝে।  
কুরুপাণ্ডব মুছে গেছে সব,  
সে রণরঙ্গ হয়েছে নীরব,  
সে চিতাবহি অতি ভৈরব  
ভস্মও নাহি তার।  
যে ভূমি লইয়া এত হানাহানি  
সে আজি কাহার তাহাও না জানি,  
কোথা ছিল রাজা কোথা রাজধানী  
চিহ্ন নাহিকো আর।  
তবু কোথা হতে আসিছে সে স্বর---  
যেন সে অমর সমরসাগর

গ্রহণ করেছে নব কলেবর  
একটি বিরাট গানে।  
বিজয়ের শেষে সে মহাপ্রয়াণ,  
সফল আশার বিষাদ মহান,  
উদাস শান্তি করিতেছে দান  
চিরমানবের প্রাণে।  
হায়, এ ধরায় কত অনন্ত  
বরষে বরষে শীত বসন্ত  
সুখে দুখে ভরি দিক-দিগন্ত  
হাসিয়া গিয়াছে ভাসি।  
এমনি বরষা আজিকার মতো  
কতদিন কত হয়ে গেছে গত,  
নবমেঘভারে গগন আনত  
ফেলেছে অশ্রুরাশি।  
যুগে যুগে লোক গিয়েছে এসেছে,  
দুখিরা কেঁদেছে, সুখীরা হেসেছে,  
প্রেমিক যেজন ভালো সে বেসেছে  
আজি আমাদেরই মতো;  
তারা গেছে, শুধু তাহাদের গান  
দু হাতে ছড়িয়ে করে গেছে দান---  
দেশে দেশে তার নাহি পরিমাণ,  
ভেসে ভেসে যায় কত।  
শ্যামলা বিপুলা এ ধরার পানে  
চেয়ে দেখি আমি মুগ্ধ নয়ানে,  
সমস্ত প্রাণে কেন-যে কে জানে  
ভরে আসে আঁখিজল---  
বহু মানবের প্রেম দিয়ে ঢাকা,  
বহু দিবসের সুখে দুখে আঁকা,  
লক্ষ যুগের সংগীতে মাথা  
সুন্দর ধরাতল!  
এ ধরার মাঝে তুলিয়া নিনাদ  
চাহি নে করিতে বাদ প্রতিবাদ,  
যে ক' দিন আছি মানসের সাধ  
মিটার আপন-মনে---

যার যাহা আছে তার থাক্ তাই,  
কারো অধিকারে যেতে নাহি চাই  
শান্তিতে যদি থাকিবারে পাই  
একটি নিভৃত কোণে।  
শুধু বাঁশিখানি হাতে দাও তুলি,  
বাজাই বসিয়া প্রাণমন খুলি,  
পুষ্পের মত সংগীতগুলি  
ফুটাই আকাশভালে।  
অন্তর হতে আহরি বচন  
আনন্দলোক করি বিরচন,  
গীতরসধারা করি সিঞ্জন  
সংসারধুলিজালে।  
অতিদুর্গম সৃষ্টিশিখরে  
অসীম কালের মহাকন্দরে  
সতত বিশ্বনির্বর ঝরে  
ঝরঝরসংগীতে,  
স্বরতরঙ্গ যত গ্রহতারা  
ছুটিছে শূন্যে উদ্দেশহারা---  
সেথা হতে টানি লব গীতধারা  
ছোটো এই বাঁশরিতে।  
ধরণীর শ্যাম করপুটখানি  
ভরি দিব আমি সেই গীত আনি,  
বাতাসে মিশায়ে দিব এক বাণী  
মধুর-অর্থ-ভরা।  
নবীন আষাঢ়ে রচি নব মায়া  
এঁকে দিয়ে যাব ঘনতর ছায়া,  
করে দিয়ে যাব বসন্তকায়া  
বাসন্তীবাস-পরা।  
ধরণীর তলে গগনের গায়  
সাগরের জলে অরণ্যছায়  
আরেকটুখানি নবীন আভায়  
রঙিন করিয়া দিব।  
সংসার-মাঝে কয়েকটি সুর  
রেখে দিয়ে যাব করিয়া মধুর,

দু-একটি কাঁটা করি দিব দূর---  
তার পরে ছুটি নিব।  
সুখহাসি আরো হবে উজ্জ্বল,  
সুন্দর হবে নয়নের জল,  
স্নেহসুধামাখা বাসগৃহতল  
আরো আপনার হবে।  
প্রেয়সী নারীর নয়নে অধরে  
আরেকটু মধু দিয়ে যাব ভরে,  
আরেকটু স্নেহ শিশুমুখ-'পরে  
শিশিরের মত রবে।  
না পারে বুঝাতে, আপনি না বুঝে  
মানুষ ফিরিছে কথা খুঁজে খুঁজে---  
কোকিল যেমন পঞ্চমে কূজে  
মাগিছে তেমনি সুর।  
কিছু ঘুচাইব সেই ব্যাকুলতা,  
কিছু মিটাইব প্রকাশের ব্যথা,  
বিদায়ের আগে দু-চারিটা কথা  
রেখে যাব সুমধুর।  
থাকো হৃদাসনে জননী ভারতী---  
তোমারি চরণে প্রাণের আরতি,  
চাহি না চাহিতে আর কারো প্রতি,  
রাখি না কাহারো আশা।  
কত সুখ ছিল হয়ে গেছে দুখ,  
কত বান্ধব হয়েছে বিমুখ,  
ল্লান হয়ে গেছে কত উৎসুক  
উন্মুখ ভালোবাসা।  
শুধু ও চরণ হৃদয়ে বিরাজে,  
শুধু ওই বীণা চিরদিন বাজে,  
স্নেহসুরে ডাকে অন্তর-মাঝে---  
আয় রে বৎস, আয়,  
ফেলে রেখে আয় হাসি ক্রন্দন,  
ছিঁড়ে আয় যত মিছে বন্ধন,  
হেথা ছায়া আছে চিরনন্দন  
চিরবসন্ত-বায়।

সেই ভালো মা গো, যাক যাহা যায়,  
জন্মের মত বরিনু তোমায়---  
কমলগন্ধ কোমল দু পায়  
বার বার নমোনম।'  
এত বলি কবি থামাইল গান,  
বসিয়া রহিল মুগ্ধনয়ান,  
বাজিতে লাগিল হৃদয় পরান  
বীণাঝংকার-সম।  
পুলকিত রাজা, আঁখি ছলছল,  
আসন ছাড়িয়া নামিলা ভূতল---  
দু বাহু বাড়ায়ে, পরান উতল,  
কবিরে লইলা বুকে।  
কহিলা 'ধন্য, কবি গো, ধন্য,  
আনন্দে মন সমাচ্ছন্ন,  
তোমারে কী আমি কহিব অন্য---  
চিরদিন থাকো সুখে।  
ভাবিয়া না পাই কী দিব তোমারে,  
করি পরিতোষ কোন্ উপহারে,  
যাহা-কিছু আছে রাজভাণ্ডারে  
সব দিতে পারি আনি।'  
প্রেমোচ্ছসিত আনন্দজলে  
ভরি দু নয়ন কবি তাঁরে বলে,  
'কণ্ঠ হইতে দেহো মোর গলে  
ওই ফুলমালাখানি।'  
মালা বাঁধি কেশে কবি যায় পথে,  
কেহ শিবিকায় কেহ ধায় রথে,  
নানা দিকে লোক যায় নানামতে  
কাজের অন্ত্রেষণে।  
কবি নিজমনে ফিরিছে লুপ্ত,  
যেন সে তাহার নয়ন মুগ্ধ  
কল্পধেনুর অমৃতদুগ্ধ  
দোহন করিছে মনে।  
কবির রমণী বাঁধি কেশপাশ  
সঙ্ক্যার মতো পরি রাঙা বাস

বসি একাকিনী বাতায়ন-পাশ---  
সুখহাস মুখে ফুটে।  
কপোতের দল চারি দিকে ঘিরে  
নাচিয়া ডাকিয়া বেড়াইছে ফিরে---  
যবের কণিকা তুলিয়া সে ধীরে  
দিতেছে চঞ্চুপুটে।  
অঙ্গুলি তার চলিছে যেমন  
কত কী-যে কথা ভাবিতেছে মন,  
হেনকালে পথে ফেলিয়া নয়ন  
সহসা কবিরে হেরি  
বাহুখানি নাড়ি মৃদু ঝিনিঝিনি  
বাজাইয়া দিল করকিঙ্কিনী,  
হাসিজালখানি অতুলহাসিনী  
ফেলিলা কবিরে ঘেরি।  
কবির চিত্ত উঠে উল্লাসি;  
অতি সস্বর সম্মুখে আসি  
কহে কৌতুকে মৃদু মৃদু হাসি,  
'দেখো কী এনেছি বালা!  
নানা লোকে নানা পেয়েছে রতন,  
আমি আনিয়াছি করিয়া যতন  
তোমার কণ্ঠে দেবার মতন  
রাজকণ্ঠের মালা।'  
এত বলি মালা শির হতে খুলি  
প্রিয়ার গলায় দিতে গেল তুলি,  
কবিনারী রোষে কর দিল ঠেলি  
ফিরায়ে রহিল মুখ।  
মিছে ছল করি মুখে করে রাগ,  
মনে মনে তার জাগিছে সোহাগ,  
গরবে ভরিয়া উঠে অনুরাগ,  
হৃদয়ে উথলে সুখ।  
কবি ভাবে বিধি অপ্রসন্ন,  
বিপদ আজিকে হেরি আসন্ন  
বসি থাকে মুখ করি বিষণ্ণ  
শূন্যে নয়ন মেলি।



কবির ললনা আধখানি বেঁকে  
চোরা কটাঞ্চে চাহে থেকে থেকে,  
পতির মুখের ভাবখানা দেখে  
মুখের বসন ফেলি  
উষকণ্ঠে উঠিল হাসিয়া,  
তুচ্ছ ছলনা গেল সে ভাসিয়া,  
চকিতে সরিয়া নিকটে আসিয়া  
পড়িল তাহার বুকে।  
সেথায় লুকায়ে হাসিয়া কাঁদিয়া  
কবির কণ্ঠ বাহুতে বাঁধিয়া  
শতবার করি আপনি সাধিয়া  
চুম্বিল তার মুখে।  
বিস্মিত কবি বিহ্বলপ্রায়  
আনন্দে কথা খুঁজিয়া না পায়,  
মালাখানি লয়ে আপন গলায়  
আদরে পরিলা সতী।  
ভক্তি-আবেগে কবি ভাবে মনে  
চেয়ে সেই প্রেমপূর্ণ বদনে---  
বাঁধা প'ল এক মাল্যবাঁধনে  
লক্ষ্মীসরস্বতী ॥

শাহাজাদপুর, ১৩ শ্রাবণ ১৩০০  
সূত্রঃ সোনার তরী

## ➤ কৃষ্ণকলি

কৃষ্ণকলি আমি তারেই বলি,  
কালো তারে বলে গাঁয়ের লোক।  
মেঘলাদিনে দেখেছিলেম মাঠে  
কালো মেয়ের কালো হরিণচোখ। -  
ঘোমটা মাথায় ছিলনা তার মোটে,  
মুক্তবেণী পিঠের 'পরে লোটে।  
কালো? তা সে যতই কালো হোক,  
দেখেছি তার কালো হরিণচোখ। -

ঘন মেঘে আঁধার হল দেখে  
ডাকতেছিল শ্যামল দুটি গাই,  
শ্যামা মেয়ে ব্যস্ত ব্যাকুল পদে  
কুটির হতে ব্রহ্ম এল তাই।  
আকাশপানে- হানি যুগল ভুরু  
শুনলে বারেক মেঘের গুরুগুরু।  
কালো? তা সে যতই কালো হোক,  
দেখেছি তার কালো হরিণচোখ। -

পূবে বাতাস এল হঠাত্ ধৈয়ে,  
ধানের ক্ষেতে খেলিয়ে গেল ঢেউ।  
আলের ধারে দাঁড়িয়েছিলেম একা,  
মাঠের মাঝে আর ছিল না কেউ।  
আমার পানে দেখলে কিনা চেয়ে,  
আমি জানি আর জানে সেই মেয়ে।  
কালো? তা সে যতই কালো হোক,  
দেখেছি তার কালো হরিণচোখ। -

এমনি করে কাজল কালো মেঘ

জ্যৈষ্ঠমাসে আসে ঈশান কোণে।

এমনি করে কালো কোমল ছায়া

আষাঢ়মাসে নামে তমালবনে। -

এমনি করে শ্রাবণরজনীতে-

হঠাৎ খুশি ঘনিয়ে আসে চিতে।

কালো? তা সে যতই কালো হোক,

দেখেছি তার কালো হরিণচোখ। -

কৃষ্ণকলি আমি তারেই বলি,

আর যা বলে বলুক অন্য লোক।

দেখেছিলাম ময়নাপাড়ার মাঠে

কালো মেয়ের কালো হরিণচোখ। -

মাথার পরে দেয়নি তুলে বাস,

লজ্জা পাবার পায়নি অবকাশ।

কালো? তা সে যতই কালো হোক,

দেখেছি তার কালো হরিণচোখ। -

## ➤ কণিকা

যথার্থ আপন

কুশ্মাণ্ডের মনে মনে বড়ো অভিমান,  
বাঁশের মাচাটি তার পুষ্পক বিমান।  
ভুলেও মাটির পানে তাকায় না তাই,  
চন্দ্রসূর্যতারকারে করে 'ভাই ভাই'।  
নভশ্চর ব'লে তাঁর মনের বিশ্বাস,  
শূন্য-পানে চেয়ে তাই ছাড়ে সে নিশ্বাস।  
ভাবে, 'শুধু মোটা এই বোঁটাখানা মোরে  
বেঁধেছে ধরার সাথে কুটুস্থিতাডোরে;  
বোঁটা যদি কাটা পড়ে তখনি পলকে  
উড়ে যাব আপনার জ্যোতির্ময় লোকে।'।  
বোঁটা যবে কাটা গেল, বুম্বিল সে খাঁটি---  
সূর্য তার কেহ নয়, সবই তার মাটি।

হাতেকলমে-

বোলতা কহিল, এ যে ক্ষুদ্র মউচাক,  
এরই তরে মধুকর এত করে জাঁক!  
মধুকর কহে তারে, তুমি এসো ভাই,  
আরো ক্ষুদ্র মউচাক রচো দেখে যাই॥

গৃহভেদ

আম্র কহে, একদিন, হে মাকাল ভাই,  
আছিঁনু বনের মাঝে সমান সবাই;  
মানুষ লইয়া এল আপনার রুচি---  
মূল্যভেদ শুরু হল, সাম্য গেল ঘুচি॥

### গরজের আত্মীয়তা

কহিল ভিষ্কার ঝুলি টাকার থলিরে,  
আমরা কুটুস্থ দোঁহে ভুলে গেলি কি রে?  
থলি বলে, কুটুস্থিতা তুমিও ভুলিতে  
আমার যা আছে গেলে তোমার ঝুলিতে॥

### কুটুস্থিতা

কেরোসিন-শিখা বলে মাটির প্রদীপে,  
ভাই ব'লে ডাকো যদি দেব গলা টিপে।  
হেনকালে গগনেতে উঠিলেন চাঁদা;  
কেরোসিন বলি উঠে, এসো মোর দাদা॥

### উদারচরিতানাম্

প্রাচীরের ছিদ্রে এক নামগোত্রহীন  
ফুটিয়াছে ছোটো ফুল অতিশয় দীন।  
ধিক্-ধিক্ করে তারে কাননে সবাই;  
সূর্য উঠি বলে তারে, ভালো আছি ভাই?।

### অসম্ভব ভালো

যথাসাধ্য-ভালো বলে, ওগো আরো-ভালো,  
কোন স্বর্গপুরী তুমি করে থাকো আলো?  
আরো-ভালো কেঁদে কহে, আমি থাকি হয়  
অকর্মণ্য দাঙ্কির অক্ষম ঈর্ষায়॥

### প্রত্যক্ষ প্রমাণ

বজ্র কহে, দূরে আমি থাকি যতক্ষণ  
আমর গর্জনে বলে মেঘের গর্জন,

বিদ্যুতের জ্যোতি বলি মোর জ্যোতি রটে,  
মাথায় পড়িলে তবে বলে--- 'বজ্র বটে!'

#### ভক্তিভাজন

রথযাত্রা, লোকারণ্য, মহা ধুমধাম---  
ভক্তেরা লুটায় পথে করিছে প্রণাম।  
পথ ভাবে 'আমি দেব', রথ ভাবে 'আমি',  
মূর্তি ভাবে 'আমি দেব'--- হাসে অন্তর্যামী ॥

#### উপকারদণ্ড

শৈবাল দিঘিরে বলে উচ্চ করি শির,  
লিখে রেখো, এক ফোঁটা দিলেম শিশির ॥

#### সন্দেহের কারণ

'কত বড়ো আমি' কহে নকল হীরাটি।  
তাই তো সন্দেহ করি নহ ঠিক খাঁটি ॥

#### অকৃতজ্ঞ

ধ্বনিটিরে প্রতিধ্বনি সদা ব্যঙ্গ করে,  
ধ্বনি-কাছে ধ্বনী সে যে পাছে ধরা পড়ে ॥

#### নিজের ও সাধারণের

চন্দ্র কহে, বিশ্বে আলো দিয়েছি ছড়িয়ে,  
কলঙ্ক যা আছে তাহা আছে মোর গায়ে ॥

### মাঝারির সতর্কতা

উত্তম নিশ্চিত্তে চলে অধমের সাথে,  
তিনিই মধ্যম যিনি চলেন তফাতে ॥

### নতিস্বীকার

তপন-উদয়ে হবে মহিমার ক্ষয়,  
তবু প্রভাতের চাঁদ শান্তমুখে কয়,  
অপেক্ষা করিয়া আছি অস্তুসিদ্ধুতীরে  
প্রণাম করিয়া যাব উদিত রবিরে ॥

### কর্তব্যগ্রহণ

কে লইবে মোর কার্য, কহে সন্ধ্যারবি---  
শুনিয়া জগত্ রহে নিরুত্তর ছবি।  
মাটির প্রদীপ ছিল; সে কহিল, স্বামী,  
আমার যেটুকু সাধ্য করিব তা আমি ॥

### ধ্রুবাণি তস্য নশ্যন্তি

রাত্রে যদি সূর্যশোকে ঝরে অশ্রুধারা  
সূর্য নাহি ফেরে, শুধু ব্যর্থ হয় তারা ॥

### মোহ

নদীর এপার কহে ছাড়িয়া নিশ্বাস,  
ও পারেতে সর্বসুখ আমার বিশ্বাস।  
নদীর ও পার বসি দীর্ঘশ্বাস ছাড়ে---  
কহে, যাহা কিছু সুখ সকলই ও পারে ॥

### ফুল ও ফল

ফুল কহে ফুকানিয়া, ফল, ওরে ফল,  
কত দূরে রয়েছিস বল মোরে বল!  
ফল কহে মহাশয়, কেন হাঁকাহাঁকি---  
তোমারই অন্তরে আমি নিরন্তর থাকি॥

### প্রশ্নের অতীত

হে সমুদ্র, চিরকাল কী তোমার ভাষা?  
সমুদ্র কহিল, মোর অনন্ত জিহ্বাসা।  
কিসের স্তব্ধতা তব ওগো গিরিবর?  
হিমাদ্রি কহিল, মোর চিরনিরন্তর॥

### মোহের আশঙ্কা

শিশু পুষ্প আঁখি মেলি হেরিল এ ধরা---  
শ্যামল, সুন্দর, স্নিগ্ধ, গীতগন্ধ-ভরা;  
বিশ্বজগতেরে ডাকি কহিল, হে প্রিয়,  
আমি যতকাল থাকি তুমিও থাকিয়ো॥

### চালক

অদৃষ্টেরে শুধালেম, চিরদিন পিছে  
অমোঘ নির্ভুর বলে কে মোরে ঠেলিছে?  
সে কহিল, ফিরে দেখো। দেখিলেম আমি,  
সম্মুখে ঠেলিছে মোরে পশ্চাতের আমি॥

সূত্রঃ কণিকা / সঞ্চয়িতা



## ➤ যাবার দিন

যাবার দিনে এই কথাটি বলে যেন যাই -  
যা দেখেছি, যা পেয়েছি, তুলনা তার নাই।  
এই জ্যোতিসমুদ্র মাঝে যে শতদল পদ্ম রাজে  
তারি মধু পান করেছি, ধন্য আমি তাই।  
যাবার দিনে এই কথাটি জানিয়ে যেন যাই।।

বিশ্বরূপের খেলাঘরে কতই গেলেম খেলে,  
অপরূপকে দেখে গেলেম দুটি নয়ন মেলে।  
পরশ যাঁরে যায় না করা সকল দেহে দিলেন ধরা,  
এইখানে শেষ করেন যদি শেষ করে দিন তাই -  
যাবার বেলা এই কথাটি জানিয়ে যেন যাই।।

২০ শ্রাবণ ১৩১৭

(কাব্যগ্রন্থঃ সঞ্চয়িতা)

## ➤ গানের পারে

দাঁড়িয়ে আছো তুমি আমার গানের ও পারে।  
আমার সুরগুলি পায় চরণ, আমি পাই নে তোমারে।  
বাতাস বহে মরি মরি, আর বেঁধে রেখো না তরী,  
এসো এসো পার হয়ে মোর হৃদয়মঝারে।।-  
তোমার সাথে গানের খেলা দূরের খেলা যে -  
বেদনাতে বাঁশি বাজায় সকল বেলা যে।  
কবে নিয়ে আমার বাঁশি বাজাবে গো আপনি আসি  
আনন্দময় নীরব রাতের নিবিড় আঁধারে?।

শান্তিনিকেতন

২৮ ফাল্গুন ১৩২০

(কাব্যগ্রন্থঃ সঞ্চয়িতা)

## ➤ এক গাঁয়ে

আমরা দুজন একটি গাঁয়ে থাকি,  
সেই আমাদের একটিমাত্র সুখ।  
তাদের গাছে গায় যে দোয়েল পাখি  
তাহার গানে আমার নাচে বুক।  
তাহার দুটি পালনকরা ভেড়া-  
চড়ে বেড়ায় মোদের বটমূলে,  
যদি ভাঙে আমার ফেতের বেড়া  
কোলের 'পরে নিই তাহারে তুলে।

আমাদের এই গ্রামের নামটি খঞ্জনা,  
আমাদের এই নদীর নামটি অঞ্জনা,  
আমার নাম তো জানে গাঁয়ের পাঁচজনে,  
আমাদের সেই তাহার নামটি রঞ্জনা।।

দুইটি পাড়ায় বড়োই কাছাকাছি,  
মাঝে শুধু একটি মাঠের ফাঁক।  
তাদের বনের অনেক মধুমাছি  
মোদের বনে বাঁধে মধুর চাক।  
তাদের ঘাটে পূজার জবামালা  
ভেসে আসে মোদের বাঁধা ঘাটে,  
তাদের পাড়ার কুসুমফুলের ডালা-  
বেচতে আসে মোদের পাড়ার হাটে।

আমাদের এই গ্রামের নামটি খঞ্জনা,  
আমাদের এই নদীর নামটি অঞ্জনা,  
আমার নাম তো জানে গাঁয়ের পাঁচজনে,  
আমাদের সেই তাহার নামটি রঞ্জনা।।

(কাব্যগ্রন্থ: সঞ্চয়িতা)

## ➤ পরশপাথর



➤ খ্যাপা খুঁজে খুঁজে ফিরে পরশপাথর।  
মাথায় বৃহৎ জটা ধূলায় কাদায় কটা,  
মলিন ছায়ার মতো ক্ষীণ কলেবর।  
ওষ্ঠে অধরেতে চাপি অন্তরের দ্বার ঝাঁপি  
রাত্রিদিন তীব্র জ্বালা জেলে রাখে চোখে।  
দুটো নেত্র সদা যেন নিশার খদ্যোত-হেন  
উড়ে উড়ে খোঁজে কারে নিজের আলোকে।  
নাহি যার চালচুলা গায়ে মাখে ছাইধুলা,  
কটিতে জড়ানো শুধু ধূসর কৌপীন,  
ডেকে কথা কয় তারে কেহ নাই এ সংসারে,  
পথের ভিখারি হতে আরো দীনহীন,  
তার এত অভিমান - সোনারূপা তুচ্ছজ্ঞান,  
রাজসম্পদের লাগি নহে সে কাতর -  
দশা দেখে হাসি পায় - আর-কিছু নাহি চায়,  
একেবারে পেতে চায় পরশপাথর।।

➤ সম্মুখে গরজে সিঙ্কু অগাধ অপার।  
তরঙ্গে তরঙ্গ উঠি হেসে হল কুটিকুটি  
সৃষ্টিছাড়া পাগলের দেখিয়া ব্যাপার।  
আকাশ রয়েছে চাহি, নয়নে নিমেষ নাহি,  
হহ করে সমীরণ ছুটেছে অবাধ।  
সূর্য ওঠে প্রাতঃকালে পূর্বগগনের ভালে,  
সন্ধ্যাবেলা ধীরে ধীরে উঠে আসে চাঁদ।  
জলরাশি অবিরল করিতেছে কলকল,  
অতল রহস্য যেন চাহে বলিবারে -  
কাম্যধন আছে কোথা জানে যেন সব কথা  
সে ভাষা যে বোঝে সেই খুঁজে নিতে পারে।  
কিছুতে ক্রক্ষেপ নাহি মহাগাথা গান গাহি  
সমুদ্র আপনি শুনে আপনার স্বর।  
কেহ যায়, কেহ আসে, কেহ কাঁদে, কেহ হাসে,  
খ্যাপা তীরে খুঁজে ফিরে পরশপাথর।।

➤ একদিনে বহুপূর্বে, আছে ইতিহাস -  
নিকষে সোনার রেখা সবে যেন দিল দেখা

আকাশে প্রথম সৃষ্টি পাইল প্রকাশ।  
 মিলি যত সুরাসুর কৌতুহলে-ভরপুর  
 এসেছিল পা টিপিয়া এই সিন্ধুতীরে -  
 অতলের পানে চাহি, নয়নে নিমেষ নাহি,  
 নীরবে দাঁড়ায়ে ছিল স্থির নতশিরে।  
 বহুকাল স্তব্ধ থাকি শুনেছিল মুদে আঁখি  
 এই মহাসমুদ্রের গীতি চিরন্তন।  
 তার পরে কৌতুহলে ঝাঁপায়ে অগাধ জলে  
 করেছিল এ অনন্ত রহস্য মন্ডন।  
 বহুকাল দুঃখ সেবি নিরখিল - লক্ষ্মীদেবী  
 উদিল জগৎ-মাঝে অতুল সুন্দর।  
 সেই সমুদ্রের তীরে শীর্ণদেহে জীর্ণচীরে  
 খ্যাপা খুঁজে খুঁজে ফিরে পরশপাথর।।  
 ➤ এতদিনে বুঝি তার ঘুচে গেছে আশ।  
 খুঁজে খুঁজে ফিরে তবু, বিশ্রাম না জানে কভু -  
 আশা গেছে, যায় নাই খোঁজার অভ্যাস।  
 বিরহী বিহঙ্গ ডাকে সারানিশি তরুশাখে,  
 যারে ডাকে তার দেখা পায় না অভাগা।  
 তবু ডাকে সারাদিন আশাহীন, শ্রান্তিহীন -  
 একমাত্র কাজ তার ডেকে ডেকে জাগা।  
 আর-সব কাজ ভুলি আকাশে তরঙ্গ তুলি  
 সমুদ্র না জানি করে চাহে অবিরত।  
 যত করে হয়-হয় কোনোকালে নাহি পায়,  
 তবু শূন্যে তোলে বাহ - ওই তার ব্রত।  
 করে চাহি ব্যোমতলে গ্রহ তারা লয়ে চলে  
 অনন্ত সাধনা করে বিশ্বচরাচর।  
 সেইমত সিন্ধুতটে ধূলিমাখা দীর্ঘজটে  
 খ্যাপা খুঁজে খুঁজে ফিরে পরশপাথর।।  
 ➤ একদা শুধালো তারে গ্রামবাসী ছেলে,  
 'সন্ধ্যাসীঠাকুর এ কী, কাঁকালে ওকি ও দেখি?  
 সোনার শিকল তুমি কোথা হতে পেলে?'  
 সন্ধ্যাসী চমকি ওঠে, শিকল সোনার বটে!  
 লোহা সে হয়েছে সোনা জানে না কখন।  
 একি কান্ড চমৎকার! তুলে দেখে বারবার,

আঁখি কচালিয়া দেখে - এ নহে স্বপন।  
কপালে হানিয়া কর ব'সে পড়ে ভূমি-'পর,  
নিজেরে করিতে চাহে নির্দয় লাঞ্ছনা -  
পাগলের মতো চায় - কোথা গেল, হয় হয়,  
ধরা দিয়ে পলাইল সফল বাঞ্ছনা।  
কেবল অভ্যাসমত নুড়ি কুড়াইত কত,  
ঠন্ করে ঠেকাইত শিকলের 'পর -  
চেয়ে দেখিত না, নুড়ি দূরে ফেলে দিত ছুঁড়ি,  
কখন ফেলেছে ছুঁড়ে পরশপাথর।।  
➤ তখন যেতেছে অস্তে মলিন তপন।  
আকাশ সোনার বর্ণ, সমুদ্র গলিত স্বর্ণ,  
পশ্চিম দিগ্ধু দেখে সোনার স্বপন।  
সন্ধ্যাসী আবার ধীরে পূর্বপথে যায় ফিরে  
খুঁজিতে নূতন করে হারানো রতন।  
সে শক্তি নাহি আর - নুয়ে পড়ে দেহভার,  
অন্তর লুটায় ছিন্ন তরুর মতন।  
পুরাতন দীর্ঘপথ প'ড়ে আছে মৃতবৎ  
হেথা হতে কত দূর নাহি তার শেষ।  
দিক্ হতে দিগন্তরে মরুবালি ধুধু করে,  
আসন্ন রজনীছায়ে ল্লান সর্বদেশ।  
অর্ধেক জীবন খুঁজি কোন্ ক্ষণে চক্ষু বুজি  
স্পর্শ লভেছিল যার এক-পল-ভর,  
বাকি অর্ধ ভগ্ন প্রাণ আবার করিছে দান  
ফিরিয়া খুঁজিতে সেই পরশপাথর।।

➤ শান্তিনিকেতন

১৯ জ্যৈষ্ঠ ১২৯৯

➤

(কাব্যগ্রন্থঃ সঞ্চয়িতা)

## ➤ দায়মোচন

চিরকাল রবে মোর প্রেমের কাঙাল,  
এ কথা বলিতে চাও বোলো।  
এই ক্ষণটুকু হোক সেই চিরকাল -  
তার পরে যদি তুমি ভোল  
মনে করাব না আমি শপথ তোমার,  
আসা যাওয়া দু দিকেই খোলা রবে দ্বার -  
যাবার সময় হলে যেয়ো সহজেই,  
আবার আসিতে হয় এসো।  
সংশয় যদি রয় তাহে ক্ষতি নেই,  
তবু ভালোবাস যদি বেসো।।

বন্ধু, তোমার পথ সম্মুখে জানি,  
পশ্চাতে আমি আছি বাঁধা।  
অশ্রুনে বৃথা শিরে কর হানি  
যাত্রায় নাহি দিব বাধা।  
আমি তব জীবনের লক্ষ্য তো নহি,  
ভুলিতে ভুলিতে যাবে হে চিরবিরহী,  
তোমার যা দান তাহা রহিবে নবীন  
আমার স্মৃতির আঁখিজলে -  
আমার যা দান সেও জেনো চিরদিন  
রবে তব বিস্মৃতিতলে।।

দূরে চলে যেতে যেতে দ্বিধা করি মনে  
যদি কভু চেয়ে দেখ ফিরে,  
হয়তো দেখিবে আমি শূন্য শয়নে -  
নয়ন সিক্ত আঁখিনীরে।  
মার্জনা কর যদি পাব তবে বল,  
করুণা করিলে নাহি ঘোচে আঁখিজল -  
সত্য যা দিয়েছিলে থাক মোর তাই,  
দিবে লাজ তার বেশি দিলে।

দুঃখ বাঁচাতে যদি কোনোমতে চাই  
দুঃখের মূল্য না মিলে।।

দুর্বল স্নান করে নিজ অধিকার  
বরমাল্যের অপমানে।  
যে পারে সহজে নিতে যোগ্য সে তার,  
চেয়ে নিতে সে কভু না জানে।  
প্রেমেরে বাড়াতে গিয়ে মিশাব না ফাঁকি,  
সীমারে মানিয়া তার মর্যাদা রাখি -  
যা পেয়েছি সেই মোর অক্ষয় ধন,  
যা পাই নি বড়ো সেই নয়।  
চিত্ত ভরিয়া রবে ঋণিক মিলন  
চিরবিচ্ছেদ করি জয়।।

(কাব্যগ্রন্থঃ সঞ্চয়িতা)



## ➤ প্রাণ

মরিতে চাহি না আমি সুন্দর ভুবনে,  
মানবের মাঝে আমি বাঁচিবার চাই।  
এই সূর্যকরে এই পুষ্পিত কাননে  
জীবন্ত হৃদয়! মাঝে যদি স্থান পাই-  
ধরায় প্রাণের খেলা চিরতরঙ্গিত,  
বিরহ মিলন কত হাসি- ময়-অশ্রু-  
মানবের সুখে দুঃখে গাঁথিয়া সংগীত  
যদি গো রচিত পাই অমর! আশ্রয়-  
তা যদি না পাই, তবে বাঁচি যত কাল  
তোমাদের মাঝখানে লভি যেন ঠাঁই,  
তোমরা তুলিবে বলে সকাল বিকাল  
নব নব সংগীতের কুসুম ফুটাই।  
হাসিমুখে নিয়া ফুল, তার পরে হয়  
ফেলে দিয়ো ফুল, যদি সে ফুল শুকায়।।

(কাব্যগ্রন্থঃ সঞ্চয়িতা)

## ➤ দান

কাঁকনজোড়া এনে দিলেম যবে-,  
ভেবেছিলেম, হয়তো খুশি হবে।  
তুলে তুমি নিলে হাতের 'পরে,  
ঘুরিয়ে তুমি দেখলে ঞ্গেকতরে-,  
পরেছিলে হয়তো গিয়ে ঘরে -  
হয়তো বা তা রেখেছিলে খুলে।  
এলে যেদিন বিদায় নেবার রাতে  
কাঁকনদুটি দেখি নাই তো হাতে,  
হয়তো এলে ভুলে।।

দেয় যে জনা কী দশা পায় তাকে,  
দেওয়ার কথা কেনই মনে রাখে!  
পাকা যে ফল পড়ল মাটির টানে  
শাখা আবার চায় কি তাহার পানে।  
বাতাসেতেদেওয়া গানে-উড়িয়ে-  
তারে কি আর স্মরণ করে পাখি?  
দিতে যারা জানে এ সংসারে  
এমন ক'রেই তারা দিতে পারে  
কিছু না রয় বাকি।।

নিতে যারা জানে তারাই জানে,  
বোঝে তারা মূল্যটি কোনখানে।  
তারাই জানে, বুকের রক্তহারে  
সেই মণিটি কজন দিতে পারে  
হৃদয় দিতে দেখিতে হয় যারে -  
যে পায় তারে সে পায় অবহেলে।  
পাওয়ার মতন পাওয়া যারে কহে  
সহজ বলেই সহজ তাহা নহে,  
দৈবে তারে মেলে।।

ভাবি যখন ভেবে না পাই তবে  
দেবার মতো কী আছে এই ভবে।  
কোন্ খনিতে কোন্ ধনভান্ডারে,  
সাগরপারে-তলে কিম্বা সাগর-,  
যক্ষরাজের লক্ষমণির হারে  
যা আছে তা কিছুই তো নয় প্রিয়ে!  
তাই তো বলি যাকিছু মোর দান-  
গ্রহণ করেই করবে মূল্যবান  
আপন হৃদয় দিয়ে।।

আল্ভেস জাহাজ  
৩ নভেম্বর ১৯২৪ (১৩৩১ কার্তিক ১৭)

(কাব্যগ্রন্থঃ সঞ্চয়িতা)

## ➤ চিরআমি-

যখন পড়বে না মোর পায়ের চিহ্ন এই বাটে,  
বাইব না মোর খেয়াতরী এই ঘাটে,  
চুকিয়ে দেব বেচাকেনা-, মিটিয়ে দেব লেনাদেনা-  
বন্ধ হবে আনাগোনা এই হাটে -  
আমায় তখন নাই বা মনে রাখলে,  
তারার পানে চেয়ে চেয়ে নাই বা আমায় ডাকলে।।

যখন জমবে ধূলা তানপুরাটার তারগুলায়,  
কাঁটালতা উঠবে ঘরের দ্বারগুলায়,  
ফুলের বাগান ঘন ঘাসের পরবে সজ্জা বনবাসের,  
শ্যাওলা এসে ঘিরবে দিঘির ধারগুলায় -  
আমায় তখন নাই বা মনে রাখলে,  
তারার পানে চেয়ে চেয়ে নাই বা আমায় ডাকলে।।

যখন এমনি করেই বাজবে বাঁশি এই নাটে,  
কাটবে গো দিন যেমন আজও দিন কাটে।  
ঘাটে ঘাটে খেয়ার তরী এমনি সেদিন উঠবে ভরি,  
চরবে গোরু, খেলবে রাখাল ওই মাঠে।  
আমায় তখন নাই বা মনে রাখলে,  
তারার পানে চেয়ে চেয়ে নাই বা আমায় ডাকলে।।

তখন কে বলে গো, সেই প্রভাতে নেই আমি?  
সকল খেলায় করবে খেলা এইআমি। -  
নতুন নামে ডাকবে মোরে, বাঁধবে নতুন বাহুর ডোরে,  
আসব যাব চিরদিনের সেইআমি। -  
আমায় তখন নাই বা মনে রাখলে,  
তারার পানে চেয়ে চেয়ে নাই বা আমায় ডাকলে।।

(কাব্যগ্রন্থঃ সঞ্চয়িতা)

## ➤ চিরায়মানা

যেমন আছ তেমনি এসো, আর কোরো না সাজ।  
বেণী নাহয় এলিয়ে রবে, সিঁথি নাহয় বাঁকা হবে,  
নাই-বা হল পত্রলেখায় সকল কারুকাজ।  
কাঁচল যদি শিথিল থাকে নাইকো তাহে লাজ।  
যেমন আছ তেমনি এসো, আর করো না সাজ।।

এসো দ্রুত চরণদুটি তুণের 'পরে ফেলে।  
ভয় কোরো না অলক্তরাগ - মোছে যদি মুছিয়া যাক,  
নূপুর যদি খুলে পড়ে নাহয় রেখে এলে।  
খেদ কোরো না মালা হতে মুক্তা খসে গেলে।  
এসো দ্রুত চরণদুটি তুণের 'পরে ফেলে।

হেরো গো ওই আঁধার হল, আকাশ ঢাকে মেঘে।  
ও পার হতে দলে দলে বকের শ্রেণী উড়ে চলে,  
থেকে থেকে শূন্য মাঠে বাতাস ওঠে জেগে।  
ওই রে গ্রামের গোষ্ঠমুখে ধেনুরা ধায় বেগে।  
হেরো গো ওই আঁধার হল, আকাশ ঢাকে মেঘে।।

প্রদীপখানি নিবে যাবে, মিথ্যা কেন জ্বালো?  
কে দেখতে পায় চোখের কাছে কাজল আছে কি না আছে,  
তরল তব সজল দিঠি মেঘের চেয়ে কালো।  
আঁখির পাতা যেমন আছে এমনি থাকা ভালো।  
কাজল দিতে প্রদীপখানি মিথ্যা কেন জ্বালো?।

এসো হেসে সহজ বেশে, আর কোরো না সাজ।  
গাঁথা যদি না হয় মালা ক্ষতি তাহে নাই গো বালা,  
ভূষণ যদি না হয় সারা ভূষণে নাই কাজ।  
মেঘ মগন পূর্বগগন, বেলা নাই রে আজ।  
এসো হেসে সহজ বেশে, নাইবা হল সাজ।। -

শিলাইদহ, ২৭ জ্যৈষ্ঠ ১৩০৭

(কাব্যগ্রন্থঃ সঞ্চয়িতা)

## ➤ ছল

তোমারে পাছে সহজে বুঝি তাই কি এত লীলার ছল -  
বাহিরে যবে হাসির ছটা ভিতরে থাকে আঁথির জল।  
বুঝি গো আমি, বুঝি গো তব ছলনা -  
যে কথা তুমি বলিতে চাও সে কথা তুমি বল না।।

তোমারে পাছে সহজে ধরি কিছুই তব কিনারা নাই -  
দশের দলে টানি গো পাছে করুপ তুমি, বিমুখ তাই।  
বুঝি গো আমি, বুঝি গো তব ছলনা -  
যে পথে তুমি চলিতে চাও সে পথে তুমি চল না।।

সবার চেয়ে অধিক চাহ, তাই কি তুমি ফিরিয়া যাও -  
হেলার ভরে খেলার মতো ভিক্ষাবুলি ভাসায়ে দাও?  
বুঝেছি আমি, বুজেছি তব ছলনা -  
সবার যাহে তৃপ্তি হল তোমার তাহে হল না।।

(কাব্যগ্রন্থঃ সঞ্চয়িতা)

## ➤ ব্যর্থ

যদি প্রেম দিল না প্রাণে  
কেন ভোরের আকাশ ভরে দিলে এমন গানে গানে?  
কেন তারার মালা গাঁথা,  
কেন ফুলের শয়ন পাতা,  
কেন দখিন হাওয়া গোপন কথা জানায় কানে কানে?।

যদি প্রেম দিলে না প্রাণে  
কেন আকাশ তবে এমন চাওয়া চায় এ মুখের পানে?  
তবে ঝঞ্জে ঝঞ্জে কেন  
আমার হৃদয় পাগল হেন,  
তরী সেই সাগরে ভাসায় যাহার কূল সে নাহি জানে?।

শান্তিনিকেতন  
২৮ আশ্বিন ১৩২০

(কাব্যগ্রন্থঃ সঞ্চয়িতা)

## বর্ষার দিনে

এমন দিনে তারে বলা যায়  
এমন ঘনঘোর বরিষায় -  
এমন মেঘস্বরে বাদল-ঝরঝরে  
তপনহীন ঘন তমসায়।।

সে কথা শুনিবে না কেহ আর,  
নিভৃত নির্জন চারি ধার।  
দুজনে মুখোমুখি গভীর দুখে দুখি,  
আকাশে জল ঝরে অনিবার -  
জগতে কেহ যেন নাহি আর।।

সমাজ সংসার মিছে সব,  
মিছে এ জীবনের কলরব।  
কেবল আঁখি দিয়ে আঁখির সুখা পিয়ে  
হৃদয় দিয়ে হৃদি-অনুভব -  
আঁধারে মিশে গেছে আর সব।।

বলিতে ব্যথিবে না নিজ কান,  
চমকি উঠিবে না নিজ প্রাণ।  
সে কথা আঁখিনীরে মিশিয়া যাবে ধীরে,  
বাদলবায়ে তার অবসান -  
সে কথা ছেয়ে দিবে দুটি প্রাণ।।

তাহাতে এ জগতে ক্ষতি কার  
নামাতে পারি যদি মনোভার!  
শ্রাবণবরিষনে একদা গৃহকোণে  
দু কথা বলি যদি কাছে তার  
তাহাতে আসে যাবে কিবা কার।।

আছে তো তার পরে বারো মাস -  
উঠিবে কত কথা, কত হাস।  
আসিবে কত লোক, কত-না দুখশোক,  
সে কথা কোনখানে পাবে নাশ -  
জগৎ চলে যাবে বারো মাস।।

ব্যাকুল বেগে আজি বহে বায়,  
বিজুলি থেকে থেকে চমকায়।  
যে কথা এ জীবনে রহিয়া গেল মনে

সে কথা আজি যেন বলা যায়  
এমন ঘনঘোর বরিষায়।।

(কাব্যগ্রন্থঃ সঞ্চয়িতা)



## মানসী

শুধু বিধাতার সৃষ্টি নহ তুমি নারী!  
পুরুষ গড়েছে তোরে সৌন্দর্য সঞ্চারি  
আপন অন্তর হতে। বসি কবিগণ  
সোনার উপমাসূত্রে বুনিছে বসন।  
সঁপিয়া তোমার 'পরে নূতন মহিমা  
অমর করেছে শিল্পী তোমার প্রতিমা।  
কত বর্ণ, কত গন্ধ, ভূষণ কত-না -  
সিন্ধু হতে মুক্তা আসে, খনি হতে সোনা,  
বসন্তের বন হতে আসে পুষ্পভার,  
চরণ রাঙাতে কীট দেয় প্রাণ তার।  
লজ্জা দিয়ে, সজ্জা দিয়ে, দিয়ে আবরণ,  
তোমারে দুর্লভ করি করেছে গোপন।  
পড়েছে তমার 'পরে প্রদীপ্ত বাসনা -  
অর্ধেক মানবী তুমি, অর্ধেক কল্পনা।।

## দেবতার গ্রাস

গ্রামে গ্রামে সেই বার্তা রটি গেল ক্রমে -  
মৈত্র মহাশয় যাবে সাগরসংগমে  
তীর্থস্থান লাগি। সঙ্গীদল গেল জুটি  
কত বালবৃদ্ধ নরনারী, নৌকাদুটি  
প্রস্তুত হইল ঘাটে।

পুণ্যলোভাতুর

মোক্ষদা কহিল আসি, 'হে দাদাঠাকুর,  
আমি তব হব সাথি।' বিধবা যুবতী,  
দুখানি করুণ আঁখি মানে না যুকতি,  
কেবল মিনতি করে - অনুরোধ তার  
এড়ানো কঠিন বড়ো। 'স্থান কোথা আর'  
মৈত্র কহিলেন তারে। 'পায়ে ধরি তব'  
বিধবা কহিল কাঁদি, 'স্থান করি লব  
কোনমতে এক ধারে।' ভিজে গেল মন;  
তবু দ্বিধাভরে তারে শুধালো ব্রাহ্মণ,  
'নাবালক ছেলেটির কী করিবে তবে?'  
উত্তর করিল নারী, 'রাখাল? সে রবে  
আপন মাসির কাছে। তার জন্ম-পরে  
বহুদিন ভুগেছি সূতিকার স্বরে,  
বাঁচিব ছিল না আশা; অল্পদা তখন  
আপন শিশুর সাথে দিয়ে তারে স্তন  
মানুষ করেছে যত্নে - সে হতে ছেলে  
মাসির আদরে আছে মার কোল ফেলে।  
দুরন্ত মানে না কারে, করিলে শাসন  
মাসি আসি অশ্রুজলে ভরিয়া নয়ন  
কোলে তারে টেনে লয়। সে থাকিবে সুখে  
মার চেয়ে আপনার মাসিমার বৃকে।'

সম্মত হইল বিপ্র। মোক্ষদা সম্বর  
প্রস্তুত হইল বাঁধি জিনিস-পত্তর,  
প্রাণমিয়া গুরুজনে, সখীদলবলে  
ভাসাইয়া বিদায়ের শোক-অশ্রুজলে।  
ঘাটে আসি দেখে, সেথা আগেভাগে ছুটি  
রাখাল বসিয়া আছে তরী-পরে উঠি  
নিশ্চিন্ত নীরবে। 'তুই হেথা কেন ওরে'  
মা শুধালো; সে কহিল, 'যাইব সাগরে।'  
'যাইবি সাগরে! আরে, ওরে দস্যু ছেলে,

নেমে আয়।' পুনরায় দূত চক্ষু মেলে  
সে কহিল দুটি কথা, 'যাইব সাগরে।'  
যত তার বাহু ধরি টানাটানি করে  
রহিল সে তরঙ্গী আঁকড়ি। অবশেষে  
ব্রাহ্মণ করুণ স্নেহে কহিলেন হেসে,  
'থাক থাক, সঙ্গে যাক।' মা রাগিয়া বলে,  
'চল তোরে দিয়ে আসি সাগরের জলে।'  
যেমনি সে কথা গেল আপনার কানে  
অমনি মায়ের বক্ষ অনুতাপবাণে  
বিঁধিয়া কাঁদিয়া উঠে। মুদিয়া নয়ন  
'নারায়ণ নারায়ণ' করিল স্মরণ।  
পুত্রে নিল কোলে তুলি, তার সর্ব দেহে  
করুণ কল্যাণহস্ত বুলাইল স্নেহে।  
মৈত্র তারে ডাকি ধীরে চুপি চুপি কয়,  
'ছি ছি ছি, এমন কথা বলিবার নয়।'  
রাখাল যাইবে সাথে স্থির হল কথা -  
অন্নদা লোকের মুখে শুনি সে বারতা  
ছুটে আসি বলে, 'বাছা, কোথা যাবি ওরে!'  
রাখাল কহিল হাসি, 'চলিনু সাগরে,  
আবার ফিরিব মাসি।' পাগলের প্রায়  
অন্নদা কহিল ডাকি, 'ঠাকুরমশায়,  
বড়ো যে দুরন্ত ছেলে রাখাল আমার,  
কে তাহারে সামালিবে! জন্ম হতে তার  
মাসি ছেড়ে বেশিক্ষণ থাকে নি কোথাও।  
কোথা এরে নিয়ে যাবে, ফিরে দিয়ে যাও।'  
রাখাল কহিল, 'মাসি, যাইব সাগরে,  
আবার ফিরিব আমি।' বিপ্র স্নেহভরে  
কহিলেন, 'যতক্ষণ আমি আছি ভাই,  
তোমার রাখাল লাগি কোন ভয় নাই।  
এখন শীতের দিন, শান্ত নদীনদ,  
অনেক যাত্রীর মেলা, পথের বিপদ  
কিছু নাই - যাতায়াতে মাস-দুই কাল -  
তোমারে ফিরায়ে দিব তোমার রাখাল।'

শুভক্ষণে দুর্গা স্মরি নৌকা দিল ছাড়ি।  
দাঁড়ায়ে রহিল ঘাটে যত কুলনারী  
অশ্রুচোখে। হেমন্তের প্রভাতশিশিরে  
ছলছল করে গ্রাম চূর্ণীন্দীতীরে।।

যাত্রীদল ফিরে আসে; সাঙ্গ হল মেলা,  
তরঙ্গী তীরেতে বাঁধা অপরাহ্নবেলা  
জোয়ারের আশে। কৌতুহল অবসান,

কাঁদিতেছে রাখালের গৃহগত প্রাণ  
মাসির কোলের লাগি। জল শুধু জল  
দেখে দেখে চিত্ত তার হয়েছে বিকল।  
মসৃণ চিক্ৰণ কৃষ্ণ কুটিল নির্ভূর,  
লোলুপ লেলিহজিহ্ব সর্পসম ক্রুর  
খল জল ছল-ভরা, তুলি লক্ষ ফণা  
ফুঁসিছে গর্জিছে নিত্য করিছে কামনা  
মৃতিকার শিশুদের, লালায়িত মুখ।  
হে মাটি, হে স্নেহময়ী, অয়ি মৌনমুক,  
অয়ি স্থির, অয়ি ধ্রুব, অয়ি পুরাতন,  
সর্ব-উপদ্রবসহা আনন্দভবন  
শ্যামলকোমলা, যেথা যে-কেহই থাকে  
অদৃশ্য দু বাহু মেলি টানিছ তাহাকে  
অহরহ, অয়ি মুগ্ধে, কী বিপুল টানে  
দিগন্তবিস্তৃত তব শান্ত বক্ষ-পানে!

চঞ্চল বালক আসি প্রতি ক্ষণে ক্ষণে  
অধীর উৎসুক কর্তে শুধায় ব্রাহ্মণে,  
'ঠাকুর, কখন আজি আসিবে জোয়ার?'

সহসা স্তিমিত জালে আবেগসঞ্চার  
দুই কূল চেতাইল আশার সংবাদে।  
ফিরিল তরীর মুখ, মৃদু আর্তনাদে  
কাছিতে পড়িল টান, কলশব্দগীতে  
সিন্ধুর বিজয়রথ পশিল নদীতে -  
আসিল জোয়ার। মাঝি দেবতারে স্মরি  
স্বরিত উত্তর মুখে খুলে দিল তরী।  
রাখাল শুধায় আসি ব্রাহ্মণের কাছে,  
'দেশে পঁছছিতে আর কত দিন আছে?'

সূর্য অস্ত না যাইতে, ক্রোশ দুই ছেড়ে  
উত্তর বায়ুর বেগে ক্রমে উঠে বেড়ে।  
রূপনারানের মুখে পড়ি বালুচর  
সংকীর্ণ নদীর পথে বাধিল সমর  
জোয়ারের স্রোতে আর উত্তরসমীরে  
উত্তাল উদ্দাম। 'তরণী ভিড়াও তীরে'  
উচ্চকণ্ঠে বারম্বার কহে যাত্রীদল।  
কোথা তীর! চারি দিকে ক্ষিপ্তোন্মত্ত জল  
আপনার রুদ্ধনৃত্যে দেয় করতালি  
লক্ষ লক্ষ হাতে। আকাশেরে দেয় গালি  
ফেনিল আক্রোশে। এক দিকে যায় দেখা  
অতিদূর তীরপ্রান্তে নীল বনরেখা -

অন্য দিকে লুন্ধ ক্ষুন্ধ হিংস্র বারিরাশি  
প্রশান্ত সূর্যাস্ত-পানে উঠিছে উচ্ছ্বাসি  
উদ্ধত বিদ্রোহভরে। নাহি মানে হাল,  
ঘুরে টলমল তরী অশান্ত মাতাল  
মূঢ়সম। তীর শীতপবনের সনে  
মিশিয়া ত্রাসের হিম নরনারীগণে  
কাঁপাইছে থরহরি। কেহ হতবাক্,  
কেহ-বা ক্রন্দন করে ছাড়ি উর্ধ্বডাক,  
ডাকি আয়োজনে। মৈত্র শৃঙ্খ পাংশুমুখে  
চক্ষু মদি করে জপ। জননীর বুকে  
রাখাল লুকায়ে মুখ কাঁপিছে নীরবে।  
তখন বিপন্ন মাঝি ডাকি কহে সবে,  
'বাবারে দিয়েছে ফাঁকি তোমাদের কেউ,  
যা মেনেছে দেয় নাই, তাই এত ঢেউ -  
অসময়ে এ তুফান। শুন এই বেলা,  
করহ মানত রক্ষা, করিয়ো না খেলা  
ক্রুদ্ধ দেবতার সনে।' যার যত ছিল  
অর্থ বস্ত্র যাহা-কিছু জলে ফেলি দিল।  
না করি বিচার। তবু তখনি পলকে  
তরীতে উঠিল জল দারুণ ঝলকে।  
মাঝি কহে পুনর্বীর, 'দেবতার ধন  
কে যায় ফিরায়ে লয়ে, এই বেলা শোন্।'

ব্রাহ্মণ সহসা উঠি কহিলা তখনি  
মোক্ষদারে লক্ষ্য করি, 'এই সে রমনী,  
দেবতারে সাঁপি দিয়া আপনার ছেলে  
চুরি করে নিয়ে যায়!' 'দাও তারে ফেলে'  
একবাক্যে গর্জি উঠে তরাসে নির্ভুর  
যাত্রী সবে। কহে নারী, 'হে দাদাঠাকুর,  
রক্ষা করো, রক্ষা করো!' দুই দৃঢ় করে  
রাখালে প্রাণপণে বক্ষে চাপি ধরে।।

ভৎসিয়া গর্জিয়া উঠি কহিলা ব্রাহ্মণ,  
'আমি তোমার রক্ষাকর্তা! রোষে নিশ্চেতন  
মা হয়ে আপন পুত্র দিলি দেবতারে,  
শেষ কালে আমি রক্ষা করিব তাহারে!  
শোধ দেবতার ঋণ, সত্য ভঙ্গ করে  
এতগুলি প্রাণী তুই ডুবাবী সাগরে!'  
মোক্ষদা কহিল, 'অতি মূর্থ নারী আমি,  
কী বলেছি রোষবশে ওগো অন্তর্যামী,  
সেই সত্য হল! সে যে মিথ্যা কতদূর  
তখনি শুনে কি তুমি বোঝ নি ঠাকুর!'

শুধু কি মুখের বাক্য শুনেছ দেবতা!  
শোন নি কি জননীর অন্তরের কথা!'

বলিতে বলিতে যত মিলি মান্নি-দাঁড়ি  
বল করি রাখালে নল ছিঁড়ি কাড়ি  
মার বক্ষ হতে। মৈত্র মুদি দুই আঁখি  
ফিরায়ে রহিল মুখ কানে হাত ঢাকি,  
দন্তে দন্ত চাপি বলে। কে তারে সহসা  
মর্মে মর্মে আঘাতিল বিদ্যুতের কশা -  
দংশিল বৃশ্চিকদংশ। 'মাসি! মাসি! মাসি!'  
বিক্লি বহির শলা রুদ্ধ কর্ণে আসি  
নিরুপায় অনাথের অস্তিমের ডাক।  
চিংকারি উঠিল বিপ্র, 'রাখ! রাখ! রাখ!'  
চকিতে হেরিল চাহি মূর্ছি আছে পড়ে  
মোক্ষদা চরণে তাঁর। মুহূর্তের তরে  
ফুটন্ত তরঙ্গ-মাঝে মেলি আর্ত চোখ  
'মাসি' বলি ফুকরিয়া মিলালো বালক  
অনন্ততিমিরতলে। শুধু ক্ষীণ মূর্তি,  
বারেক ব্যাকুল বলে উর্ধ্ব-পানে উঠি  
আকাশে আশ্রয় খুঁজি ডুবিল হতাশে।  
'ফিরায়ে আনিব তোরে' -কহি উর্ধ্বশ্বাসে  
ব্রাহ্মণ মুহূর্ত-মাঝে ঝাপ দিল জলে।  
আর উঠিল না! সূর্য গেল অস্তাচলে।।

## নির্ব্বরের স্বপ্নভঙ্গ

আজি এ প্রভাতে রবির কর  
কেমনে পশিল প্রাণের পর,  
কেমনে পশিল গুহার আঁধারে প্রভাতপাখির গান!  
না জানি কেন রে এত দিন পরে জাগিয়া উঠিল প্রাণ।  
জাগিয়া উঠেছে প্রাণ,  
ওরে উখলি উঠেছে বারি,  
ওরে প্রাণের বাসনা প্রাণের আবেগ রুধিয়া রাখিতে নারি।  
থর থর করি কাঁপিছে ভূধর,  
শিলা রাশি রাশি পড়িছে থসে,  
ফুলিয়া ফুলিয়া ফেনিল সলিল  
গরজি উঠিছে দারুণ রোষে।  
হেথায় হোথায় পাগলের প্রায়  
ঘুরিয়া ঘুরিয়া মাতিয়া বেড়ায় -  
বাহিরেতে চায়, দেখিতে না পায় কোথায় কারার দ্বার।  
কেন রে বিধাতা পাষণ হেন,  
চারি দিকে তার বাঁধন কেন!  
ভাঙ রে হৃদয়, ভাঙ রে বাঁধন,  
সাধ রে আজিকে প্রাণের সাধন,  
লহরীর পরে লহরী তুলিয়া  
আঘাতের পরে আঘাত কর।  
মাতিয়া যখন উঠেছে পরান  
কিসের আঁধার, কিসের পাষণ!  
উখলি যখন উঠেছে বাসনা  
জগতে তখন কিসের ডর!

আমি ঢালিব করুণাধারা,  
আমি ভাঙিব পাষণকারা,  
আমি জগৎ প্লাবিয়া বেড়াব গাহিয়া  
আকুল পাগল-পারা।  
কেশ এলাইয়া, ফুল কুড়াইয়া,

রামধনু-আঁকা পাখা উড়াইয়া,  
রবির কিরণে হাসি ছড়াইয়া দিব রে পরান ঢালি।  
শিখর হইতে শিখরে ছুটিব,  
ভূধর হইতে ভূধরে লুটিব,  
হেসে খলখল গেয়ে কলকল তালে তালে দিব তালি।  
এত কথা আছে, এত গান আছে, এত প্রাণ আছে মোর,  
এত সুখ আছে, এত সাধ আছে - প্রাণ হয়ে আছে ভোর।।

কী জানি কী হল আজি, জাগিয়া উঠিল প্রাণ -  
দূর হতে শুনি যেন মহাসাগরের গান।  
ওরে, চারি দিকে মোর  
এ কী কারাগার ঘোর -  
ভাঙ ভাঙ ভাঙ কারা, আঘাতে আঘাত কর।  
ওরে আজ কী গান গেয়েছে পাখি,  
এসেছে রবির কর।।



## আষাঢ়

নীল নবঘনে আষাঢ়গগনে তিল ঠাঁই আর নাহি রে।  
ওগো, আজ তোরা যাস নে ঘরের বাহিরে।  
বাদলের ধারা ঝরে ঝরঝর,  
আউশের ক্ষেত জলে ভরভর,  
কালি-মাখা মেঘে ও পারে আঁধার ঘনিছে দেখ্ চাহি রে।  
ওগো, আজ তোরা যাস নে ঘরের বাহিরে।।

ওই ডাকে শোনো ধেনু ঘনঘন, ধবলীরে আনো গোহালে।  
এখনি আঁধার হবে বেলাটুকু পোহালে।  
দুয়ারে দাঁড়ায়ে ওগো দেখ্ দেখি  
মাঠে গেছে যারা তারা ফিরিছে কি,  
রাখালবালক কী জানি কোথায় সারা দিন আজি খোয়ালে।  
এখনি আঁধার হবে বেলাটুকু পোহালে।।

শোনো শোনো ওই পারে যাবে বলে কে ডাকিছে বুঝি  
মাঝিরে।  
খেয়া-পারাপার বন্ধ হয়েছে আজি রে।  
পুবে হাওয়া বয়, কূলে নেই কেউ,  
দু কূল বাহিয়া উঠে পড়ে ঢেউ,  
দরদর বেগে জলে পড়ি জল ছলছল উঠে বাজি রে।  
খেয়া-পারাপার বন্ধ হয়েছে আজি রে।।

ওগো, আজ তোরা যাস নে গো, তোরা যাসনে ঘরের বাহিরে।  
আকাশ আঁধার, বেলা বেশি আর নাহি রে।  
ঝরঝর ধারে ভিজিবে নিচোল,  
ঘাটে যেতে পথ হয়েছে পিছল,  
ওই বেণুবন দুলে ঘনঘন পথপাশে দেখ্ চাহি রে।  
ওগো, আজ তোরা যাস নে ঘরের বাহিরে।।

- শিলাইদহ

২০ জ্যৈষ্ঠ, ১৩০৭

## দুই বিঘা জমি

শুধু বিঘে-দুই ছিল মোর ভুঁই, আর সবই গেছে ঋণে।  
বাবু বলিলেন, 'বুঝেছ উপেন? এ জমি লইব কিনে।' -  
কহিলাম আমি, 'তুমি ভূস্বামী, ভূমির অন্ত নাই -  
চেয়ে দেখো মোর আছে বড়জোর মরিবার মতো ঠাই।  
শুনি রাজা কহে, 'বাপু, জানো তো হে, করেছি বাগানখানা,  
পেলে দুই বিঘে প্রস্বে ও দিঘে সমান হইবে টানা -  
ওটা দিতে হবে।' কহিলাম তবে বক্ষে জুড়িয়া পাণি  
সজল চক্ষে, 'করুন রক্ষে গরিবের ভিটেখানি।  
সম্প্রপুরুষ যেথায় মানুষ সে মাটি সোনার বাড়ি,  
দৈন্যের দায়ে বেচিব সে মায়ে এমনি লক্ষ্মীছাড়া!' -  
আঁখি করি লাল রাজা ক্ষণকাল রহিল মৌনভাবে,  
কহিলেন শেষে ফুর হাসি হেসে, 'আচ্ছা, সে দেখা যাবে।'

পরে মাস-দেড়ে ভিটে মাটি ছেড়ে বাহির হইনু পথে -  
করিল ডিক্রি, সকলই বিক্রি মিথ্যা দেনার খতে।  
এ জগতে হয় সেই বেশি চায় আছে যার ভূরি ভূরি,  
রাজার হস্ত করে সমস্ত কাঙালের ধন চুরি।  
মনে ভাবিলাম, মোরে ভগবান রাখিবে না মোহগর্তে,  
তাই লিখি দিল বিশ্বনিখিল দু বিঘার পরিবর্তে।  
সন্ন্যাসীবেশে ফিরি দেশে দেশে হইয়া সাধুর শিষ্য -  
কত হেরিলাম মনোহর ধাম, কত মনোরম দৃশ্য।  
ভূধরে সাগরে বিজনে নগরে যখন যেখানে ভ্রমি  
তবু নিশিদিনে ভুলিতে পারি নে সেই দুই বিঘা জমি।  
হাটে মাঠে বাটে এইমত কাটে বছর পনেরো-ষোলো,  
একদিন শেষে ফিরিবারে দেশে বড়োই বাসনা হল।।

নমোনমো নম, সুন্দরী মম জননী বঙ্গভূমি!  
গঙ্গার তীর, সিন্ধু সমীর জীবন জুড়ালে তুমি।  
অবারিত মাঠ, গগনললাট চুমে তব পদধূলি -  
ছায়াসুনিবিড় শান্তির নীড় ছোটো ছোটো গ্রামগুলি।  
পল্লবঘন আম্রকানন, রাখালের খেলাগেহ -  
সুন্ধ অতল দিঘি কালোজল নিশীথশীতলস্নেহ।

বুক-ভরা-মধু বঙ্গের বধু জল লয়ে যায় ঘরে  
মা বলিতে প্রাণ করে আনচান, চোখে আসে জল ভরে।  
দুই দিন পরে দ্বিতীয় প্রহরে প্রবেশিনু নিজগ্রামে -  
কুমোরের বাড়ি দক্ষিণে ছাড়ি, রথতলা করি বামে,  
রাখি হাটখোলা নন্দীর গোলা, মন্দির করি পাছে  
তৃষাতুর শেষে পঁহুঁছিনু এসে আমার বাড়ির কাছে।।

ধিক্ ধিক্ ওরে, শত ধিক্ তোরে নিলাজ কুলটা ভূমি,  
যখনি যাহার তখনি তাহার - এই কি জননী তুমি!  
সে কি মনে হবে একদিন যবে ছিলে দরিদ্রমাতা  
আঁচল ভরিয়া রাখিতে ধরিয়া ফলফুল শাক-পাতা!  
আজ কোন্ রীতে কারে ভুলাইতে ধরেছ বিলাসবেশ -  
পাঁচরঙা পাতা অঞ্চলে গাঁথা, পুষ্পে খচিত কেশ!  
আমি তোমার লাগি ফিরেছি বিবাগি গৃহহারা সুখহীন,  
তুই হেথা বসি ওরে রাক্ষসী, হাসিয়া কাটাস দিন!  
ধনীর আদরে গরব না ধরে! এতই হয়েছ ভিন্ন -  
কোনোখানে লেশ নাই অবশেষ সে দিনের কোনো চিহ্ন!  
কল্যাণময়ী ছিলে তুমি অয়ী, ক্ষুধাহারা সুধারাসি।  
যত হাসো আজ, যত করো সাজ, ছিলে দেবী - হলে দাসী।।

বিদীর্ণহিয়া ফিরিয়া ফিরিয়া চারি দিকে চেয়ে দেখি -  
প্রাচীরের কাছে এখনো যে আছে সেই আমগাছ একি!  
বসি তার তলে নয়নের জলে শান্ত হইল ব্যথা,  
একে একে মনে উদিল স্মরণে বালককালের কথা।  
সেই মনে পড়ে, জ্যেষ্ঠের ঝড়ে রাত্রে নাইকো ঘুম,  
অতি ভোরে উঠি তাড়াতাড়ি ছুটি আম কুড়াবার ধুম।  
সেই সুমধুর স্তব্ধ দুপুর, পাঠশালা-পলায়ন -  
ভাবিলাম হয়, আর কি কোথায় ফিরে পাব সে জীবন।  
সহসা বাতাস ফেলি গেল শ্বাস শাখা দুলাইয়া গাছে,  
দুটি পাকা ফল লভিল ভূতল আমার কোলের কাছে।  
ভাবিলাম মনে, বুঝি এতখনে আমারে চিনিল মাতা।  
স্নেহের সে দানে বহু সম্মানে বারেক ঠেকানু মাথা।।

হেনকালে হয় যমদূতপ্রায় কোথা হতে এল মালী।  
ঝুঁটিবাঁধা উড়ে সপ্তম সুরে পাড়িতে লাগিল গালি।  
কহিলাম তবে, 'আমি তো নীরবে দিয়েছি আমার সব -  
দুটি ফল তার করি অধিকার, এত তারি কলরব।'  
চিনিল না মোরে, নিয়ে গেল ধরে কাঁধে তুলি লাঠিগাছ;  
বাবু ছিপ হাতে পারিষদ-সাথে ধরিতেছিলেন মাছ -  
শুনে বিবরণ ত্রোদে তিনি কন, 'মারিয়া করিব খুন।'  
বাবু যত বলে পারিষদ-দলে বলে তার শতগুণ।  
আমি কহিলাম, 'শুধু দুটি আম ভিখ মাগি মহাশয়!'  
বাবু কহে হেসে, 'বেটা সাধুবশে পাকা চোর অতিশয়!'  
আমি শুনে হাসি, আঁখিজলে ভাসি, এই ছিল মোরে ঘটে -  
তুমি মহারাজ সাধু হলে আজ, আমি আজ চোর বটে।।

## আমাদের ছোট নদী (সহজ পঠ্য)

আমাদের ছোটো নদী চলে বাঁকে বাঁকে  
বৈশাখ মাসে তার হাঁটু জল থাকে।  
পার হয়ে যায় গোরু, পার হয় গাড়ি,  
দুই ধার উঁচু তার, ঢালু তার পাড়ি।

টিক্ টিক্ করে বালি, কোথা নাই কাদা,  
একধারে কাশবন ফুলে ফুলে সাদা।  
কিচিমিচি করে সেথা শালিকের ঝাঁক,  
রাতে ওঠে থেকে থেকে শেয়ালের হাঁক।

আর-পারে আমবন তালবন চলে,  
গাঁয়ের বামুন পাড়া তারি ছয়াতলে।  
তীরে তীরে ছেলে মেয়ে নাইবার কালে  
গামছায় জল ভরি গায়ে তারা ঢালে।

সকালে বিকালে কভু নাওয়া হলে পরে  
আঁচল ছাঁকিয়া তারা ছোটো মাছ ধরে।  
বালি দিয়ে মাজে থালা, ঘটিগুলি মাজে,  
বধূরা কাপড় কেচে যায় গৃহকাজে।

আষাঢ়ে বাদল নামে, নদী ভর ভর  
মাতিয়া ছুটিয়া চলে ধারা খরতর।  
মহাবেগে কলকল কোলাহল ওঠে,  
ঘোলা জলে পাকগুলি ঘুরে ঘুরে ছোটো।  
দুই কূলে বনে বনে পড়ে যায় সাড়া,  
বরষার উৎসবে জেগে ওঠে পাড়া।।

## প্রশ্ন

ভগবান, তুমি যুগে যুগে দূত পাঠায়েছ বারে বারে  
দয়্যাহীন সংসারে -

তারা বলে গেল 'ক্ষমা করো সব', বলে গেল 'ভালোবাসো -  
অন্তর হতে বিদ্বেষবিশ নাশো'।

বরণীয় তারা, স্মরণীয় তারা, তবুও বাহির-দ্বারে  
আজি দুর্দিনে ফিরানু তাদের ব্যর্থ নমস্কারে।

আমি যে দেখেছি গোপন হিংসা কপটরাত্রি-ছায়ে  
হেনেছে নিঃসহায়ে।

আমি যে দেখেছি - প্রতিকারহীন, শক্তের অপরাধে  
বিচারের বাণী নীরব নিভূতে কাঁদে।

আমি যে দেখিনি তরুণ বালক উন্মাদ হয়ে ছুটে  
কী যন্ত্রণায় মরেছে পাথরে নিস্কল মাথা কুটে।।

কন্ঠ আমার রুদ্ধ আজিকে, বাঁশি সংগীতহারা,  
অমাবস্যার কারা

লুপ্ত করেছে আমার ভূবন দুঃস্বপ্নের তলে।

তাই তো তোমায় শুধাই অশ্রুজলে -

যাহারা তোমার বিষাইছে বায়ু, নিভাইছে তব আলো,  
তুমি কি তাদের ক্ষমা করিয়াছ, তুমি কি বেসেছ ভালো?

সূত্রঃ পরিশেষ

## সোনার তরী

গগনে গরজে মেঘ, ঘন বরষা।  
কূলে একা বসে আছি, নাহি ভরষা।  
রাশি রাশি ভারৱা ভারৱা  
ধান কাটা হল সারা,  
ভরা নদী ফুরধারা  
থরপরশা।  
কাটিতে কাটিতে ধান এল বরষা।

একখানি ছোট খেত, আমি একেলা,  
চারি দিকে বাঁকা জল করিছে খেলা।  
পরপারে দেখি আঁকা  
তরুছায়ামসীমাখা  
গ্রামখানি মেঘে মেঘে ঢাকা  
প্রভাতবেলা-  
এ পারেতে ছোটো খেত, আমি একেলা।

গান গেয়ে তরী বেয়ে কে আসে পারে,  
দেখে যেন মনে হয় চিনি উহারে।  
ভরা-পালে চলে যায়,  
কোনদিকে নাহি চায়,  
চেউগুলি নিরুপায়  
ভাঙে দু ধারে-  
দেখে যেন মনে হয় চিনি উহারে।

## দুর্ভাগা দেশ

হে মোর দুর্ভাগা দেশ, যাদের করেছ অপমান,  
অপমানে হতে হবে তাহাদের সবার সমান।

মানুষের অধিকারে  
বঞ্চিত করেছ যারে,  
সম্মুখে দাঁড়ায়ে রেখে তবু কোলে দাও নাই স্থান  
অপমানে হতে হবে তাহাদের সবার সমান।

মানুষের পরশেরে প্রতিদিন ঠেকাইয়া দূরে  
ঘৃণা করিয়াছ তুমি মানুষের প্রাণের ঠাকুরে।  
বিধাতার রুদ্ররোষে  
দুর্ভিক্ষের-দ্বারে বসে  
ভাগ করে খেতে হবে সকলের সাথে অন্নপান।  
অপমানে হতে হবে তাহাদের সবার সমান।

তোমার আসন হতে যেথায় তাদের দিলে ঠেলে  
সেথায় শক্তিরে তব নির্বাসন দিলে অবহেলে।  
চরণে দলিত হয়ে  
ধূলায় সে যায় বয়ে -  
সেই নিম্নে নেমে এসো, নহিলে নাহি রে পরিত্রাণ।  
অপমানে হতে হবে আজি তোরে সবার সমান।

যারে তুমি নীচে ফেল সে তোমারে বাঁধিবে যে নীচে,  
পশ্চাতে রেখেছ যারে সে তোমারে পশ্চাতে টানিছে।  
অজ্ঞানের অন্ধকারে  
আড়ালে ঢাকিছ যারে  
তোমার মঙ্গল ঢাকি গড়িছে সে ঘোর ব্যবধান।  
অপমানে হতে হবে তাহাদের সবার সমান।

শতক শতাব্দী ধরে নামে শিরে অসম্মানভার,  
মানুষের নারায়ণে তবুও কর না নমস্কার।  
তবু নত করি আঁখি  
দেখিবার পাও না কি



নেমেছে ধূলার তলে হীনপতিতের ভগবান।  
অপমানে হতে হবে সেথা তোরে সবার সমান।

দেখিতে পাও না তুমি মৃত্যুদূত দাঁড়ায়েছে দ্বারে -  
অভিশাপ আঁকি দিল তোমার জাতির অহংকারে।  
সবারে না যদি ডাকো,  
এখনো সরিয়া থাকো,  
আপনারে বেঁধে রাখো চৌদিকে জড়ায়ে অভিমান -  
মৃত্যু-মার্মে হবে তবে চিতাভস্মে সবার সমান।

## প্রার্থনা

চিত্ত যেথা ভয়শূন্য, উচ্চ যেথা শির,  
জ্ঞান যেথা মুক্ত, যেথা গৃহের প্রাচীর  
আপন প্রাপ্তগতলে দিবসশর্বরী  
বসুধারে রাখে নাই খন্ড ক্ষুদ্র করি,  
যেথা বাক্য হৃদয়ের উৎসমুখ হতে  
উচ্ছাসিয়া উঠে, যেথা নির্বারিত স্রোতে  
দেশে দেশে দিশে দিশে কর্মধারা ধায়  
অজস্র সহস্রবিধ চরিতার্থতায়,  
যেথা তুচ্ছ আচারের মরুবালুরাশি  
বিচারের স্রোতঃপথ ফেলে নাই গ্রাসি-  
পৌরুষেরে করে নি শতধা, নিত্য যেথা  
তুমি সর্ব কর্ম চিন্তা আনন্দের নেতা,  
নিজ হস্তে নির্দয় আঘাত করি, পিতঃ,  
ভারতেরে সেই স্বর্গে করো জাগরিত।।

সূত্রঃ নৈবদ্য

## ১৪০০ সাল

আজি হতে শতবর্ষ পরে  
কে তুমি পড়িছ বসি আমার কবিতাখানি  
কৌতুহলভরে,  
আজি হতে শতবর্ষ পরে!  
আজি নব বসন্তের প্রভাতের আনন্দের  
লেশমাত্র ভাগ,  
আজিকার কোনো ফুল, বিহঙ্গের কোনো গান,  
আজিকার কোনো রক্তরাগ-  
অনুরাগে সিক্ত করি পারিব কি পাঠাইতে  
তোমাদের করে,  
আজি হতে শতবর্ষ পরে?

তবু তুমি একবার খুলিয়া দক্ষিণদ্বার  
বসি বাতায়নে  
সুদূর দিগন্তে চাহি কল্পনায় অবগাহি  
ভেবে দেখো মনে-  
একদিন শতবর্ষ আগে  
চঞ্চল পুলকরাশি কোন্ স্বর্গ হতে ভাসি  
নিখিলের মর্মে আসি লাগে,  
নবীন ফাল্গুনদিন সকল-বন্ধন-হীন  
উন্মত্ত অধীর,  
উড়ায়ে চঞ্চল পাখা পুষ্পরেণুগন্ধমাখা  
দক্ষিণসমীর  
সহসা আসিয়া স্বরা রাঙায়ে দেয়েছে ধরা  
যৌবনের রাগে,  
তোমাদের শতবর্ষ আগে।  
সেদিন উতলা প্রাণে, হৃদয় মগন গানে,  
কবি একা জাগে-  
কত কথা পুষ্প প্রায় বিকশি তুলিতে চায়

কত অনুরাগে,  
একদিন শতবর্ষ আগে।

আজি হতে শতবর্ষ পরে  
এখন করিছে গান সে কোন্ নুতন কবি  
তোমাদের ঘরে!  
আজিকার বসন্তের আনন্দ-অভিবাদন  
পাঠায়ে দিলাম তাঁর করে।  
আমার বসন্তগান তোমার বসন্তদিনে  
ধ্বনিত হউক ঋণতরে-  
হৃদয়স্পন্দনে তব, ব্রমরগুঞ্জে নব,  
পল্লবমর্মরে,  
আজি হতে শতবর্ষ পরে।।

## নিরুদ্দেশ যাত্রা

আর কতদূরে নিয়ে যাবে মোরে  
হে সুন্দরী?  
বলো, কোন পার ভিড়িবে তোমার  
সোনার তরী  
যখনই শুধাই, ওগো বিদেশিনী,  
তুমি হাস শুধু মধুরহাসিনী-  
বুঝিতে না পারি, কী জানি কী আছে  
তোমার মনে।  
নীরবে দেখাও অঙ্গুলি তুলি  
অকুল সে উঠিছে আকুলি,  
দূরে পশ্চিমে ডুবিছে তপন  
গগনকোণে।  
কী আছে হোথায়-চলেছি কিসের  
অন্বেষণে?

বলো দেখি মোরে, শুধাই তোমায়  
অপরিচিতা-  
ওই যেথা স্বলে সন্ধ্যার কূলে  
দিনের চিতা,  
ঝরিতেছে জল তরল অনল,  
গলিয়া পড়িছে অম্বরতল,  
দিকবধু যেন ছলছল-আঁখি  
অশ্রুজলে,  
হোথায় কি আছে আশ্রয় তোমার  
উর্মিমুখর সাগরের পার  
মেঘচুম্বিত অস্তগিরির  
চরণতলে?  
তুমি হাস শুধু মুখপানে চেয়ে  
কথা না বলে।

